

日色新一部洛陽吹法曲三呼嵩岳舞神人更催青鳥邀王母  
願獻蟠桃不計春進中宮謠曰伏觀殿下光膺景命夙  
夜圖理王妃殿下承乾內佐治功既成四方寧謐然猶求卹  
民隱爰舉虞巡之典天順四年冬十月巡幸關西誕在德音僅  
越月車駕還京師歡騰九陌頌聲洋溢妾等幸際昌辰獲覩盛  
事不勝慶抃謹獻頌詞并疏短引伏以隨日馭以還紫宸咸仰  
冰輪之彩催霓裳而下玄圃教迓玉輦之塵敢獻謠歌庶垂採  
納詞曰天運方亨聖神誕作思齊我后克配厥德二曜并明四  
方畢燭尚慮民隱省方宜亟法駕啓行時維農隙翟茀以從于  
西乃適迺諏迺詢迺求民瘼父母孔邇載撫載育于邇于遐德  
洋恩洽孰寒不燠孰飢無食懿其休固是煦是吹閭閻皞皞爭  
歡以嬉維願我后眉壽無極且願我后子孫千億萬口齊呼頌  
聲載路月僅再營迺旋玉珞維彼西人又怨我遺維此都人亦  
訴何遲天蹕才聞填咽閭闔小大稽首競騰嵩呼梨園賤隸何  
幸親覩輒獻鄙謠庶效天保且蹈且舞長言干達道駐輦良

久覽訖遂行日晡還宮百官進賀箋不受俄而兩殿御思  
政殿政府六曹忠勳府進豐呈隨駕及留都宗親宰樞承旨  
等皆入侍極歡夜分乃罷○賜吏曹判書具致寬兵曹叅判金  
碩京畿觀察使黃孝源各馬一匹○刑曹據咸吉道觀察使啓  
本啓北青囚私婢卯加伊與奸夫沈青謀殺其夫請卯加伊凌  
遲處死青處斬同謀水山絞從之○丁丑命吏兵曹還給  
金石梯朴仲善等告身○命義禁府放息津付處具顯忠○戊  
寅御思政殿受常叅視事上顧見同知中樞院事河漢曰吾  
見讓寧則思田獵見金鉤金末則思書籍見河漢則思征討我  
則無可無不可內贍判事金滿等五人輪對上謂諸宰樞曰  
輪對獨入之弊不少小人陰欲謀害與已不協者或言宗親大  
臣之過失如此則宗親大臣不可保全也是以予於常叅朝啓  
之日許令輪對與大臣共議可否大抵所言公公言之所言私  
王者無私輪對獨入之法不可行也宜載諸大典垂之萬世○  
命兵曹罷江原道諸處講武場許民耕種○己卯知中樞院事

朴薑率賻米豆并四十石紙一百卷油菘四部等物薑性精巧  
多技能自筮仕恒典軍器監至判事歷吏曹叅議黃海道觀察  
使與佐翼功臣至是扈從道病卒少豪俠善修容多通名妓又  
得亂臣尹令孫妻權專女通之謚世襄承命不遷世因事有功  
襄○傳旨吏曹曰內侍府司謁廬山宮闈丞全信內贍寺奴全  
壽追錄原從功臣三等○庚辰 諭平安道觀察使曹孝門江  
原道觀察使金繼孫黃海道觀察使李石亨曰道內諸邑可耕  
闕曠之地親審可為水田幾結負旱田幾結負量數速啓○辛  
巳 命吏兵曹選給李樛材河紹義告身○傳旨兵曹曰下三  
道諸邑人戶內取才入格京軍士外諸邑軍士及良民鄉戶中  
富實者慶尚道二千五百戶全羅道一千五百戶忠清道五百  
戶抄定徙居于平安黃海江原道閑曠之地又曰今平安黃海  
江原道勒令徙居下三道諸邑人戶及平安黃海江原咸吉道  
諸邑自願徙居人內徙居于黃海道白川延安海州安岳豐川  
瓮津文化長連信川長淵松禾康翎殷栗江原道原州江陵三

陟襄陽平海通川旌善杯城寧越平昌高城蔚珍歙谷安峽等  
邑者復戶十二年免稅九年黃海道谷山遂安載寧新溪牛峯  
免山江陰平安道江西龍崗咸從永柔三和甑山等邑者復戶  
十三年免稅十年黃海道平山瑞興鳳山黃州平安道中和平  
壤順安祥原德川价川慈山順川三登殿山陽德孟山肅川成  
川江原道春川伊川狼川洪川橫城楊口麟蹄咸吉道安邊德  
源文川高原永興定平咸興等邑者復戶十四年免租十一年  
平安道寧邊安州嘉山隨川宣川定州郭山鐵山龍川泰川熙  
川龜城江原道淮陽金城金化鐵原平康咸吉道洪原北青利  
城端川吉州等邑者復戶十五年免稅十二年平安道義州朔  
州昌城江界理山碧潼咸吉道鏡城富寧會寧鍾城穩城慶源  
慶興甲山等邑者復戶十六年免稅十三年並待三年後定軍  
役其復戶限年間勿令騎載迎送○壬午以厚生為德泉君金  
連枝中樞院使韓繼美戶曹參判西原君金繼孫同知中樞院  
事李石亨許亨孫中樞院副使尹子雲仁壽府尹茂松君尹士

忻仁順府尹黃孝源漢城府尹商山君金禮蒙司憲府大司憲  
李克培廣陵君徐居正禮曹參議權擊工曹參議李孟孫具文  
老鄭俊許銖柳興茂趙得琳李蒙哥僉知中樞院事李施愛慶  
興府使朴保生富寧府使○遣右參贊成奉祖于京畿審定田  
品等第○論赴征將士軍功一等超三資二等超二資三等超  
一資又賜申叔舟奴婢十口親子三人皆加一資洪允成奴  
婢八口子弟一人加資鄭軾金師禹金繼孫郭連城康純朴炯  
康孝文奴婢各六口李克培許亨孫金貴孫四口朴大生趙邦  
霖三口○癸未百官行 聖節及 中宮誕日賀禮 上與中  
宮御思政殿設中宮誕日宴兼慰北征將士 命洪允成 傳  
于從事官及軍官等曰汝等皆為國就死地而還誠可哀憫今  
宜盡醉極歡 御製樂府曰蕞爾阻聲教豈能逃一怒雪恥酬  
百王除凶報千古我有一介臣風霜操獨露右一章在此皆稷  
契在彼盡韓白廟葺定全勝一舉震蠻貊凱旋朝野欣陳尊臣  
主洽右二章憂患生安樂暢遠矣困窮天命固靡常惟善以為

從母忘交修志思與有始終右三章於是命工效彼之管絃  
而奏命侍宴諸宰皆和之賜申叔舟鞍具馬一匹彤弓一允  
成郭連城李克培金師禹許亨孫康孝文朴大生各內廐馬一  
匹弓一○甲申御忠順堂觀射內宗親及寶城君容順城君  
謹左議政申叔舟右議政權孽判中樞院事沈滄中樞院使沈  
決入直都鎮撫衛將司僕赴征將士承旨等入侍俄而御後  
苑召叔舟等設酌射侯上謂北征軍士等曰卿等為我冒死  
從戎予甚嘉之其各飲酒勿辭謂行副司直閔安壽曰卿是  
元敬王后族親故特召之賜豹皮阿多介一坐命進宗親宰  
樞二品以上謂曰江原黃海平安三道空曠可耕之地曾命分  
給卿等耕墾至今不行戶曹何慢也此等事當自貴近始須先  
給宗親可也雲城府院君朴從愚啓臣已受耕墾上笑曰卿  
自誇矣孽繼曰臣亦已令耕墾但未為熟田耳上曰卿二人  
當賞曹錫文當罰錫文時為戶曹判書○兵曹據平安黃海道  
都體察使啓本啓自罷碧潼郡阿耳口子後於吾音會里設寨

稱大平堡聚洞源居民入保頃因都巡察使之請罷大平堡而  
於阿耳口子夏則量定軍士守護農民冬則入保邑城今觀阿  
耳口子地形洞上各里距邑城隔遠入保為難而口子在銅巾  
鴨綠兩江合流之內四山險峻設堡之處完固距理山六十餘  
里碧潼九十里實是兩邑之中且口子洞上左右居民碧潼一  
百四十戶理山二十六戶人物阜盛可復立口子修葺城堡差  
萬戶防戍以為兩邑之援又碧潼郡內板幕大坡兒兩口子居  
民寡少而差權管領軍令民入保非特兵分力弱大坡兒則距  
碧潼二十里板幕則距阿耳口子三十餘里不甚相遠請兩口  
子夏則只令守護農民冬則大坡兒等處居民於碧潼邑城板  
幕等處居民於阿耳口子各以附近入保則兵勢似強防禦便  
易又啓前此令南道諸邑富實人戶徙居松江諸邑故人物阜  
盛防禦有實比來徙民逃還本邑守令亦利其役使不即刷還  
其存者十無一二請令刷還違者守令罷黜許接戶首論以制  
書有違律又啓平安道都節制使本營寧邊府距江界五百餘

里上土口子六百餘里滿浦鎮六百三十里高山里口子四百  
二十里渭原口子三百六十里理山郡三百六十里阿耳口子  
四百二十里碧潼郡五百餘里道路險遠儻有賊變必不及救  
援古理山郡城完固而距江界一百八十里滿浦一百五十里  
高山里一百二十里阿耳一百五十里碧潼二百四十里相距  
不遠且在中央請移行營於此水漲則留防寧邊水合則入戍  
古理山皆從之○丙戌先是賜宴卓于諸將及兵曹是日  
設宴於鎮撫所賜酒樂上幸宴廳賜爵于諸將及兵曹堂  
上曰予愛將士而來汝等知予意耶洪達孫等對曰臣等皆知  
上旨不勝墮越○丁亥兵曹啓宣德八年六月日曹受教節該  
蒲州江從征軍士內鄉吏軍功一等給功牌子孫免役二等已  
身免役三等限二年除役公賤一等給功牌許屬補充軍聽其  
自願充軍二等已身免役三等限二年除役今北征及朱兒温  
會寧從征人內鄉吏驛子壯勇隊一應公賤已令依蒲州江例  
施行私賤亦依公賤例論賞其一二等私賤請令刑曹充償本



主限年除後私賤不當以奴婢充給令戶曹賞給吏典及補充  
軍內仕滿應去官者一不計都目去官加資差甲士二三等  
不計都目去官加資權差甲士改試差之一等仕未滿者不計  
都目去官差甲士二不計都目去官三等自渡江至回程每  
一日給到一百接戰日則倍給而移差甲士者隨品除授從  
之○義禁府啓礪山勸農金仲止亂言罪應凌遲處死緣坐籍  
沒並如律從之命緣坐人屬官奴○戊子兵曹叅判金礪  
都鎮撫花川尉權恭衛將行上護軍李允孫等進箋謝親臨  
賜宴箋曰翠華忽至光動羽林丹扈暫留感深肺腑失心圖報  
銘骨何忘伏念臣等介冑微蹤行伍末藝俱乏借箸之策敢忘  
推食之恩天厨八珍味實兼於陸海霞流百椀澤已洽于肌膚  
仙樂徹於九重親賜踰於三爵羣歌屢舞倒載扶歸恩榮若  
茲前昔所罕茲蓋父母慈愛天地生成撫率遠邁於唐宗善將  
卓越於漢祖遂令鴛鴦獲被寵光臣等謹當倍殫赤心益勵素  
節盡瘁事國期畢命於戈予不宿于家思奮身於原野○忠獻

府請進功臣仲朔宴又請行王世子功臣會盟 傳曰近者  
宴享煩數姑待明春○己丑觀獵于清溪山○庚寅火刺温指  
揮間都等五人來獻土物○辛卯兵曹據江原咸吉道都體察  
使啓本議防戍便宜以啓一甲山鎮鎮東堡距本鎮隔遠而居  
民只二十戶加乙麻里則在中央又多居民而不設堡賊或入  
寇無以禦之請移鎮東堡于加乙麻里一甲山東北阿間洞內  
東仁院等地與賊境相近居民亦多而無農堡且無烟臺請於  
東仁院等處量宜設堡置烟臺候望一甲山鎮防禦最緊與五  
鎮無異今且有聲息而口傳軍官只三人請增定二人一甲山  
地勢斗絕四無救援之處元居軍士本少而九處分防勢分力  
弱三水堡尤為孤單請咸興大嶺以北居人舍屬三水堡防禦  
從之○壬辰日暈○火刺温兀狄哈指揮軍有等六人來獻土  
物○癸巳 御思政殿召諸將設酌○甲午遣僉知中樞院事  
趙之唐如大明進海青四連○傳于工曹曰作行宮于平壤以  
備巡幸○丙申遣戶曹叅判李皎然中樞院副使李堰奉表如

大明賀正○以火刺溫指揮間都為上護軍阿克介羅稱介軍  
有者伊里時可護軍 賜阿克介羅稱介綿布各五匹以童關  
之戰報變也○丁酉 御思政殿召諸將設酌謂吏曹判書具  
致寬朝臣移病不仕者多宜立防禁今後三朔內移病至三者  
並罷職引見火刺溫兀狄哈間都阿克介羅稱介等十一人謂  
間都曰子撫綏汝等遠近如一兀良哈等每云火刺溫欲寇朝鮮  
予知其妄置而不問今兀良哈等聞阿比車諉說累次作賊予  
甚憎之已命邊將征之直擣巢穴又命兀狄哈等擊之汝等若  
有意則可急擊無遺類對曰既聞 上教當請諸色兀狄哈共擊  
之命間都阿克介各進酒 傳曰惟爾功大當除高職但汝之  
來朝不止此耳姑除護軍○己亥日暈○御忠順堂引見火刺  
溫間都阿克介羅稱介等十一人設酌議政府都鎮撫等入侍  
命間都進酒賜衣服綿布等物又別賜有差○召宗親宰  
樞等于後苑觀射世子進酒遂行酒于宗親宰樞 上謂右議  
政權孳曰予重世子重世子所以重 宗社也又命世子進酒

○辛丑王世子未寧○盜入廣興倉盜紬布 命閉都城門搜捕○壬寅諭咸吉道都節制使朴炯曰今觀野人歸順啓本已悉賊譎詐失勢則附得勢則寇來請歸順者不可輕受其降為彼所侮也可依今月初十日降諭事目處置但其尚家下住斜于愁伊乙波何伊亂住羅赤哈等則今背賊來投欲居城底若出於誠心則不可拒之亦可辨其誠偽熟計利害而許之不可緝繆安撫○閏十一月癸卯朔○甲辰兵曹啓下三道敬差官徙民事目一徙居戶數敬差官與觀察使同議諸邑殘盛分定一例應徙居者并計子孫女婿同生兄弟雇工奴子三丁以上有財產者抄定謀避者啓聞論罪定驛吏一徙居人妻妾內公私賤口亦聽戶首情願入送濫占人子女為妻妾者痛禁一徙居人等自己冤枉內凡干推刷事敬差官聽理一徙居人內良賤辨明及奴婢訴訟事定差使負刻期決折率丁內逃避者窮推論以制書有違律定徙居處驛吏一特徙居者保授族親若里正令賣田宅裝束量其人丁多少分運預先啓聞一以人情好

惡放富抄貧則守令論以制書有違律不叙該吏亦坐此律全家徙邊一抄定時謀避逃亡者入送時逃亡者錄形標移文諸道追捕其保授族親里正勿論相為容隱囚家僮給限追捕如或符同隱諱者拷訊犯者及保授人經宿主人容匿戶首等並論以制書有違律犯者及容匿戶首全家徙邊自首及捕告者免罪一守令及察訪等徙居逃亡人不即追捕或容匿人不即現推治罪或押送時陵夷檢察以致逃亡者勿論功臣議親並論以制書有違律一發程臨時產兒及疾病者令所在守令曲加救恤後運入送在途產兒疾病者所在守令及察訪具辭以啓救恤待差發送不用心救恤者啓聞論罪一抄定時姦猾之徒飾辭發狀矇矓強辨者隨即推論其中揚說凌辱者並依法決杖鄉戶則極邊驛子良民則定為鄉吏為先入送一徙居人供頓救病及輜重轉輸餽粟輸納等事一依應募人護送例一徙居人等如有依憑供頓官門及閭閻作弊者押領察訪禁之違者依律罪之一徙居人土田勿論路邊開墾家舍則中朝使

臣來往路邊勿令造排一內禁衛別侍衛甲士破敵衛彭排隊  
卒時散朝官鷹師文武科出身有蔭子孫女婿功臣子孫女婿  
議親喪人未葬及守墳者為國亡身人子孫向化子孫白磁器  
匠七十歲以上老病人獨子戶曹重監生貢進士司譯司律院  
三醫司時仕流品以上官貢近仗別軍諸衙門吏典諸貢書貢  
養理馬牽馬陪詣站水夫齋郎樂工捉虎甲士諸色匠人津夫  
院主養賢庫權知錄事舩軍諸驛日守雜科及第出身人時任  
知印錄事內侍府同居弟姪六十歲以上十六歲以下老病人  
侍丁篤疾殘疾廢疾人一目盲者勿并徙居 從之○乙巳日暈  
○兵曹啓魯降 傳旨下三道諸邑本官富實奴婢徙居平安  
道諸邑閑曠之地請令徙民敬差官考其事目分運入送 從之  
○戶曹據京畿觀察使啓本啓本道諸邑今值歲歉穀種不敷  
諸各品科田稅以皮穀收納于州倉用下三道諸邑軍需米豆  
從願償之從之○丙午有盜毆傷甲士 命閉都門搜捕 傳  
于刑曹曰今後竊盜者絞遂下旨議政府曰愛護百姓而兼

仁於賊豈治道耶予大寬縱是予之過撲火不急其火後熾○  
命都承旨成任賫酒肉往慰臨瀛大君璆于其第又命永膺  
大君琰左議政申叔舟往祭○戊申觀獵于清溪山○全羅道  
處置使奉石柱發行忠勳府餞于漢江賜酒樂餞罷權擊李  
興商黃孝源崔濡權擊宋益孫崔潤魚孝瞻等會興商家適還  
駕至擊等奏樂請進酒許之擊進詩曰忠勳此日餞勳臣  
特賜華筵寵渥新餞罷歸來息罔極還程擬獻壽千春上印  
和之○己酉御交泰殿引見左贊成黃守身左叅贊李承孫  
右承旨韓繼禧等議郊內捕虎事命同知中樞院事鄭連城  
率軍士往獲之○御後苑觀射宗親宰樞承旨兼司僕等入侍  
○庚戌領議政姜孟卿啓臣老母在慶尚道晉州聞臣罹病憂  
慮成疾今臣病愈而母憂未解今送僕從願見臣及臣妻請往  
見命給傳又諭慶尚道觀察使賜宴于母且令致祭于內外  
先塋○夕御忠順堂觀放砲○吏曹啓堂上官窠闕數少故雖  
任事堂上官無堂上官職銜只稱上大護軍護軍而授行職與秩

早上大護軍無異請自今以堂上官授上大護軍以下行職者  
一從散官稱中樞院事行上護軍同知中樞院事行上護軍每  
品皆然從之○辛亥御思政殿受常絲楊山君揚汀來自  
咸吉道引見問曰北方已平定乎對曰時無犯境者又問曰  
彼人等歸中原者已還歟對曰今月晦時可還仍命汀進酒  
○漕轉敬差官安哲孫啓漕船一百四艘畢造又以魚鹽檢察  
將向黃海道召見曰予之於汝既無所諭又無所問以能成  
大事故見之耳凡人但當知之於始既任之後予何變更其  
所為哉言聽計行而已命進酒上曰壯哉汝之所為也哲  
孫對曰非臣之能也工匠皆感聖德鼓舞趨事耳上曰悅  
以使民民忘其勞能使人趨事者誰歟仍謂戶曹判書曹錫文  
曰哲孫歸功於上○御忠順堂觀射宗親宰樞承旨等入侍  
賜左議政申叔舟右議政權擘內廐馬各一匹又賜雲城府  
院君朴從愚領中樞院事洪達孫左贊成黃守身花川君權恭  
揚山君揚汀中樞院事沈汝禮曹判書洪允成刑曹判書朴元



亨知中樞院事崔恒吏曹判書具致寬中樞院副使尹士昉工  
曹判書尹士昉戶曹判書曹錫文行上護軍李允孫馬各一匹  
○諭諸道觀察使曰近來學校勸勵之方不無弛緩予親幸成  
均館并聚四學儒生講經製述使之激勵卿亦體予意每於巡  
行時或親到鄉校講經製述戒飭教官益勤教誨其或怠惰不  
能教訓者罪不可貸卿其曉之○傳旨禮曹曰將韋成均館聚  
四部學堂儒生或講經或製述其中優等者直赴會試○命刑  
曹 賜臨瀛大君璆永膺大君琰貞懿公主外方奴婢各一口  
○癸丑 上與中宮御忠順堂設宴宗親宰樞承旨等八侍領  
議政姜孟卿進酒次 王世子進酒賜孟卿馬一匹貂裘一領毛  
冠一馬粧兩具又賜申叔舟沈澮金礦等馬各一匹酒酣 命  
孟卿起舞又 命宗親宰樞皆起舞 上亦起舞以 王世子  
疾愈故有是宴兼餞孟卿之歸迎揚汀之來也○諭黃海平安  
道都體察使韓明澮曰今來啓本已悉豆里若更請許來居荅  
云前日已馳啓于 殿下有命曰豆里等本誠心歸順者也但

帝命勿待故待之難矣若舉衛有故則勢不得已當接待耳此  
外卿可隨宜措置○諭成吉道都節制使朴炯曰今來啓本事  
意已悉彼賊雖曰今欲歸順實窮迫姑且緩之之術也不可聽  
許宜益迫之兵法曰窮寇勿迫非此之謂也征伐之後又既犯  
邊而尋請歸順是用威於我而誘我以甘言今若從之則是操  
縱在彼虜損國威莫甚於此今後若有來請歸順者宜略饋而  
語之曰前日汝等累蒙 上息猶且犯邊 上怒征討而又來  
作賊汝之歸順必妄也當待汝等誠心歸順然後啓達取旨以  
觀其勢兀良哈所衆介及所羅舍弄介吾波等從願城內安接  
穩城囚吾沙巨令軍士傳押上送速魯帖木兒妻待產兒差病  
上送○以李邊金鈞判中樞院事兵曹判書韓明澮加崇祿吏  
曹判書具致寬刑曹判書朴元亨加崇政沈澮中樞院事崔恒  
中樞院事李純之判漢城府事金連枝同知中樞院事柳洙文城  
君金何判中樞院事奉朝請金繼孫行僉知中樞院事江原道  
觀察使洪興祚全羅道都節制使○甲寅平安黃海道都體察

使從事官吳伯昌來 御忠順堂引見 召都承旨成任兵曹

參判金磧議平安道加送軍士戰馬藥匠等事○賜躑躅花二

盆御賜花梅竹各一盆于承政院又 賜酒肉 傳曰此花不

時而開可賞○賜燕窩僕浪三波兒馬一匹吳衍弓一張以平

安道巡幸時獲禽多也○領議政姜孟卿向晉州忠勳府餞于

漢江 賜酒樂○骨看兀狄哈知中樞院事李多弄介等九人

來獻土物○乙卯 御忠順堂觀射○上聞貞石正隆生妹趙

孝山之妻活計甚窘 賜米醬衣酒等物 命宗簿寺覈隆生

不救恤之罪 召鎮南君終生問其飢寒之故且曰凡人飢渴

者當欲濟之况宗室子女乎在予固是大累宗親亦不得無罪

○丁巳以積為銀川君衍為金山正安仁厚僉知中樞院事權

軀忠清道處置使魚得海慶尚左道處置使李茵慶尚右道處

置使○諭平安黃海道都體察使韓明澮曰聞吳伯昌之言具知

卿意所陳皆善今又得金有禮事目云毛憐衛人聞妻子盡死

聚哭舍怨與建州衛人結約整兵四面入寇此雖未可必料勢

必風塵復起然後已矣若毛憐衛建州人同力作賊而見敗則其交益深不若及其未發而先制之然建州衛時無罪而兵出無名故為今之計當備而待之俟有罪即討可也今送戰馬十匹京軍士十人藥匠一人卿體予意任便施行且聞野人等本月初六七日間發北首計十二月上旬當到建州卿其知之○傳旨吏兵曹曰楊汀北征所領軍士軍功一等准他二等二等准他三等安仁厚陞為堂上官李克均依一等例陞資○戊午前此咸興船軍林玉丁年八十餘以少尹姜遇文所言干犯國家訴于觀察使囚遇文及玉丁以啓至是 諭觀察使曰今來姜遇文推鞠啓本已悉遇文識理朝士豈有如此之言林玉丁年老衰病必誤聽而告之可皆赦○奏聞使尹子雲賚勅回自大貳勅曰今得王連奏女直野人事情一稱韓朶里等自生疑惑潛往建州欲令復業一稱諸種野人累次犯邊欲令邊將相機處置所言雖異事實相關顧王激切之情朕已具悉蓋釁端禍機本起於阿比車父子今韓朶里等雖居王國終係異類既與

彼同謀結黨勢必懼罪逃生假使未逃猶應竄逐何必令其復業以遺後患今曲從王意特令兵部移文建州衛令其省諭復業不許阻留亦不許結構邊患王慮門庭之寇欲相機處置此誠不獲已者但前此建州毛憐二衛奏言欲為浪字兒罕父子報讎朕已勅各衛不許屯聚讎殺續又遣指揮馬鑑齎勅往彼宣諭今馬鑑回還奏稱於今年七月初八日到彼宣勅曉諭各衛即將所聚人馬退散且言再不敢與朝鮮結怨報讎其都指揮尚冬哈等就隨馬鑑來京謝恩及浪字兒罕孫男木哈尚亦來襲職又將原虜王國男婦得里哈等九名口送至遼東據此則王所奏事情皆在馬鑑未到之先非勅諭已至而彼故違也朕撫臨四海一視同仁前勅諭和贖欲兩處人民各安生業全彼既釋怨從化如此王可不必慮其復為患矣所送人口就令使臣領回繼今王宜歛兵自守不可復啓釁端特勅以諭王其體朕至意○骨着兀狄哈僉知中樞院事李多弄介等十人兀良哈司直李多乃等六人來獻土物○己未 御思政殿引見

李多弄介等二十七人諸將及承旨等入侍。上問野人等曰：北征時汝輩或從軍或指路或護涉皆有大功，予甚嘉之。野人等出引見中朝，刷還咸吉道被虜九人，問曰：兀良哈虜汝等時，所殺人口幾何？且汝輩之家更無被虜者乎？一女對曰：無見殺者，但吾母亦被虜，轉賣於他人，不知所之。上謂入侍諸將曰：野人情狀可憎也。○庚申起仁壽府尹尹子雲上狀辭職，曰：臣幼養于祖母，臣父與祖父皆早世，去五月祖母又辭世，臣方代喪居殯，特命起復，差奏聞使赴京，其時事急，日迫未暇辭免，今使事已完，願從情禮，不允。○骨看兀狄哈都萬戶金哥尚介等十人來獻土物。○辛酉李淑城妻金氏訴冤，曰：淑城不好，金生而司憲府枉刑取服，大司憲金禮蒙等請避嫌，不允。司憲府啓曰：淑城情見事明，而教其妻上言，反咎本府，請移他司，鞫之。并鞫曠龍上言之罪。從之。○御書諭咸吉道都督制使朴炯曰：近境野人方且震懾，又貪賞物，欲上朝者必多，其中從征告變，効順有顯，功不可防，遮者外鄉可斟酌上送，以除驛路之弊。

火刺温具州骨看兀狄哈上京者亦宜約從上送○兵曹據漕  
轉敬差官安哲孫事目啓新造漕船一百艘請以京畿忠清全  
羅道諸浦船軍多少酌量分屬從之○野人司正阿羅等十  
人來獻土物○壬戌日暈○野人護軍李多陽介等十人來獻  
土物○咸吉道都節制使都事李克均辭御書事目示都節  
制使朴炯曰一赴京來者必初歸順慎勿為所誑一今歸順者  
必皆同賊其知之一必一度大舉可碎之一相機征討勿失時  
一金波乙大將家老父可上送若尚冬介欲上京則聽○癸亥  
司憲府啓前仁川郡事柳孝祖在母喪期年之內嬖妓勝楊妃  
朝夕與慶敗常亂俗請依律科罪命杖一百配于慶尚道三  
嘉縣○乙丑御思政殿引見骨看兀狄哈金哥尚介等四十  
人諸將承旨等入侍上謂野人曰汝等功勞予已詳知阿比  
車誘諸種累次作耗其不干阿比車者屢犯邊鄙予已討之今  
來効順者有誠心乎金哥尚介等對曰兀良哈歸順者未知誠  
偽但聞彼皆悔過欲來遂命金哥尚介多陽介阿羅等進酒

○御忠順堂觀射○以護軍李多陽介為萬戶金之下千戶銷里必上護軍副司正多陽介金阿羅豆護軍李玉山司直各給綿布七匹以此征時赴戰也吾波副司正給綿布四匹以此征時捍後也副萬戶金主成哥大護軍指揮舍老護軍司正所羅副司直副司正阿用介司正大豆麻豆乙之舍弄介副司正各給綿布四匹以童關赴征也萬戶金引乙介上護軍指揮木當薛列千戶散搭木護軍副司正童阿乙加茂司正各給綿布二匹以報變也萬戶金毛多吾上護軍副護軍金劄禿金劉里介金奪哈等萬戶副司直金餘文乃朴丹用阿副千戶童亦里哈司直副司正所應介朴毛下孔司正權羅金伊朱副司正○丙寅 賜野人知中樞院事李多弄哈僉知中樞院事李家紅浪金世等鞍具馬各一匹絲囊刀子紅絲廣條兒各一綿布各十匹司直李都弄音等九人馬各一匹彩囊刀子紅絲細條兒各一綿布各七匹以此赴戰時有功也司直文果乙多等六人依三等例 賜絲囊刀子細條兒各一綿布各二匹以報變也司正童愁



郎可等二人亦依三等例 賜物又給綿布各四匹以護涉也  
副司正李玉等七人依三等例 賜物除職皆從其願也○丁  
卯日本國源朝臣教信遣使來獻土物○戊辰以兵曹參判金  
礪為黃海平安道都巡察使 諭平安道觀察使曹孝門都節  
制使黃石生黃海道觀察使李石亨等曰今都巡察使韓明滄  
妻病以兵曹參判金礪代之可聽礪節度○己巳 諭京畿黃  
海江原道觀察使曰道內深村僻巷獨居少隣者或貧居無食  
或老弱廢疾不能自立或孤寡無依仰資於人當此大雪道路  
阻礙咫尺不相通以致飢餓者必多卿差人往視曲加護恤毋  
致飢凍○命注書李壽男及內醫賈酒藥往義禁府典獄飲囚  
人寒疾者有數囚衣其簿 命賜衣○諭咸吉道都節制使朴  
炳曰卿之選精兵數千欲征討之計甚善然往中朝者未還其  
留部落者率非酋豪雖擒殺殆盡而賊種未殄不若姑戢兵機  
勿招撫勿嚴責勿受降游移前却待其還觀其所為因勢制變  
則所擒殺皆賊之真種一賊之稱順命者實舍作賊之意而姑

且緩之之術也不可輕許如前日所諭一金波乙大雖有罪而已則匿之以為我効順於國且已赦其家屬卿宜知之一伊郎介似無罪而予未的知其實卿更詳達上項事宜予在此度料耳不可遙制卿斟酌施行勿拘子諭○辛未 親行文昭殿臘享祭○禮曹啓檢察判安璟子寬厚仁厚重厚謹厚敦厚五子登科請依例賜母米致祭於父 從之○元良哈護軍梁阿同介等十人來獻土物○壬申 傳旨戶曹曰咸吉道都節制使雖不帶京職依他道觀察使節制使處置使例給祿○十二月癸酉朔○甲戌 御忠順堂觀射○乙亥以復為居平正李石亨中樞府副使金繼孫中樞院副使江原道觀察使康袞信川君權攀黃海道觀察使花山君洪順孫趙鐵山李孝溫僉知中樞院事姜眉壽司憲掌令李宗孝忠清道都節制使洪益誠慶尚右道處置使以野人護軍梁阿同介為大護軍副司正多將介司正各賜綿布四匹司正也尚介副司直所弄巨羅水副司正各賜絛布二匹副司正南介司正甫青介多右雍只也叱

多副司正皆北征時有功者也○野人中樞金權老馬仇音波  
等二十人來獻土物○丙子 御思政殿受常參視事咸吉道  
都巡察使禮曹參判康孝文辭 引見授方略 命進酒○御  
忠順堂觀射○諭咸吉道都節制使朴炯曰聽都巡察使康孝  
文之言隨宜措置○丁丑貞懿公主有疾 上幸其第問疾 還  
宮御忠順堂觀射有人啓豹在仁玉山 傳曰若使兵曹議獲  
之之術雖二三日不決即 召都鎮撫楊汀河漢與承旨等議之  
御交泰殿引見以汀為大將○戊寅楊汀率諸衛軍士及東  
西班品從驅仁玉山 上幸壯義門西岷觀行軍之形 還御  
忠順堂 命隨駕宗親宰樞侍食仍觀射○聖節使在孝仁千  
秋使梅佑來復 命○遣工曹參判宋處寬奉表如大明特准  
所奏設還本國被擄人口其表曰帝德丕冒庸篤懷柔睿謀誕  
頒深增感激佩銘曷已糜粉難酬伏念臣猥將庸資幸逢昭代  
顧乏絲毫之補偏蒙卯翼之仁值獷俗之憑陵敢煩敷奏荷明  
綸之密勿特深眷恰爰當賤介之回遂帶俘虜而至寵綏若此

前昔所稀茲蓋伏遇道合生成慈諭怙恃家四海以無外利萬物而不遺乃令敝邦荐蒙洪造臣謹當益虔釐東之職永作漢藩恒輸拱北之誠倍伸華祝方物表曰柔遠恩深特蒙天眷由中誠切仰獻土宜謹備黃細苧布三十匹白細苧布四十匹黑細麻布八十匹黃花席一十五張滿花席一十五張雜彩花席一十五張人參一百觔松子二百觔雜色馬二十五匹右件物等製造匪精名般甚夥豈合多儀之享第表祗謝之忱並獻海青二連文魚五百尾慈壽皇太后禮物紅細苧布二十匹白細苧布二十匹黑細苧布二十匹滿花席一十張雜彩花席一十張中宮禮物同謝皇太子箋曰尊居儲位允協輿望導需皇恩覃施海嶽矢心圖報鏤骨難忘伏念臣猥以謏材叨守敵服比緣虜種屢驚邊塵輒悉事機冒煩宸聽何期十行之詔曲副萬里之情况發俘虜之氓伴隨賤价而返矜憐至此感激何涯茲蓋伏遇偉量淵冲英猷日著體上聖之大德底四海之同歡遂令屢資獲紆眷殊臣謹當歌載賡於重潤壽恒祝於千年仍獻白細苧

布十匹黑細麻布三十匹人參二十觔松子一百觔雜色馬四匹○已卯平安黃海道都體察使韓明澮來 復命御交泰殿引見明澮及都承旨成任議事仍設酌○庚辰日暈○御思政殿引見野人馬仇音波等五十三人諸將及兵曹堂上承旨等八侍 上謂野人曰汝等自來效順今者北征之時功績尤著予甚嘉之金權老對曰向國効力終始如一命仇音波權老及金波老劉權者等進酒曰隨所聞即來報變予嘉汝等功勞○御忠順堂觀射○野人都萬戶元好時乃等十人來獻土物○辛巳吏曹啓忠義衛子弟去官後仍仕授京外職者請依別坐例通計本衛前仕加資從之○野人都萬戶金哥羊哈等十四人來獻土物○兵曹據江原道觀察使啓本啓本道民戶本少而加以流亡軍額日減至為可慮請自今許接流移人家長隣保限辛巳二月晦日聽其自首免罪其流亡人各還本土如有隱匿不首家長隣保及守令等依法科罪並將流寓者永屬本道殘驛吏 從之○唐人甫郎哈等三人曾見虜於女真

而來投者也。以北征時有助戰功，授司正時。沍寒禮賓寺不設鋪陳。命義禁府鞫當該官吏以啓。○壬午，御思政殿受常察視事。召宰樞設酌。○御交泰殿設酌。諸將及承旨兼司僕等入侍。引見野人中樞馬仇音波、金權老等。命皆進酒。上曰：仇音波權老年老，恐墜冰路，不勸飲。餘各盡醉。權老子波老啓曰：吾父年老，願勿賜酒。傳于權老曰：汝子以汝之醉為憂，可謂賢矣。命野人兼司僕浪將家老進酒。○尼麻車兀狄哈、豆里應、巨等八人來獻土物。○癸未，貞懿公主病劇。上與中宮幸其第問疾。○以野人司正多弄介為副司直，副司正雄古都邑道、所羅金於虛里麻尼等司正，司直巨處、副萬戶照弄介、巨知貴也。可赤加應、巨里副司正，各給綿布二匹。尚家蘆沙甫郎可者，邑同介於弄、巨等副司正，各給綿布四匹。萬戶金公、疎上、護軍副萬戶金加、加阿、李訥叱、仇於朴、撒塔哈、朴阿堂、吉護軍、劉尚尚哈等萬戶司直、金毛下、指揮殷鎖夫、萬戶司正李巨、時介、副司直副司正劉夫叱、知弄介、奎都、雙波、阿音夫等司正、金者終。

阿金尼忘阿金波叱泰副司正皆以北征時有功也○諭徙民  
敬差官等曰自募入送之限初運來辛巳正月初五日二運初十  
日三運十五日四運二十日五運二十五日且勒令入居者以  
三丁以上戶為空非只取三丁而捨四五丁以上戶也今趙之  
夏請以十二月二十日為初運入送之期又所抄率皆三丁而  
四五丁者十無一二又無六七丁以上甚失委任本意人言抄  
軍事敬差官不親而委諸守令守令又委諸品官果驗矣徙民  
重事國家所不得已之舉取富實而捨貧弱猶懼失業怨咨况  
取貧弱而遺富實乎非惟不均將敗大事此之夏大失爾知此  
意慎勿如此且州縣興廢專在鄉戶盛衰自募則已許鄉吏矣  
不可勒令徙居以殘州縣也其前後受教事目一一參詳毋致  
錯誤○甲申 御思政殿受常參視事宗親宰樞承旨等入侍  
引見唐人甫良介等二人 傳曰汝今又可徃北方乎對曰  
雖死地尚且不避但無衣服弓矢耳即 賜毛皮及弓矢仍  
命進酒○戶曹啓平安咸吉道赴防甲士等京中所受祿俸路

遠未得轉輸其告身祿牌轉相買賣於買人有違大體請自辛巳年兩界甲士祿俸給所在邑軍需陳穀紬布楮貨亦以陳穀折給其穀價令中外自願人准納於諸邑其邑轉報觀察使移文本曹本曹更加磨勘償以軍資監陳米豆咸吉道則減給四分之一平安道則五分之一若兩界年歉自無願納穀者則祿俸仍給於其道侍豐年換納其出納之際守令委諸吏輩行詐者依律痛懲 從之○兵曹啓諸邑人民憚於遷徙多般窺免守令亦不親抄定委諸人吏品官其富實多丁者遺漏未滿三丁殘戶並計別居三四寸為一戶抄定者間或有之若現則其守令論以制書有違律事干人吏品官勿論職之高下為先徙居 從之○丙戌 觀放鷹于東郊 駕還至永膺大君第問疾○戊子以尼麻車兀狄哈豆里應巨阿乙愁為上護軍多和老班車於虛茂羅吾也女真非沙右仇愁副司正護軍殷仇音波大護軍指揮阿多受能副萬戶司正李甫陽介副司直副司正童波也介童亂道司正伊羅介下乙伊班車副司正各給綿



布二匹以報變也又以上護軍金加化資窮故只給縣布四匹以助戰童關也護軍金柱丁格大護軍指揮金沙仲谷金探哈金撒魯哈司直金伊即介副萬戶副司正劉諸右加應巨司正金能仇致李阿乙知時劉安之劉波思羅李終者阿副司正○刑曹啓時方沔寒請輕囚則保放鞫之其餘及後囚人每日盡初更推鞫斷罪 御書曰甚可○曲宴于交泰殿永膺大君琰疾劇遣桂陽君增與任元濬問疾 命承政院鞫醫負金吉浩不動看病之罪以啓○己丑兵曹啓安集徙民致差官賣去事日一諸邑閑曠沃饒可耕之地與守令審定計丁量給而隨地之宜或十戶或十餘戶完聚使之有無相資一諸邑隨宜備給農器如有在途牛斃者令用傍近元居人牛耕田一守令察訪等徙居人遞相押送輜重遲滯轉輸或有失者啓聞科罪一徙居人等穀種口糧量其人丁及所耕多少比他優給 從之○庚寅兵曹據司僕寺提詒狀啓南陽府使已管境內牧場六處而今又兼水原陽也串牧場水原府以陽也串他邑所管如列

芟草等事必不用意檢察請以水原府使兼管 從之○辛卯  
御交泰殿觀棒戲引見野人豆里應巨等十餘人宗親宰樞承  
旨等入侍○咸吉道都節制使馳啓事變 御交泰殿引見入直  
承旨議事夜二鼓 名左議政申叔舟都承旨成任兵曹判書  
韓明澮都鎮撫楊汀議作事目回諭○以前鍾城判官申興禮  
在任時不能應賊變 命刑曹囚鞠之○壬辰 御思政殿召  
宗親宰樞觀棒戲引見兀狄哈菲舍豆應巨等十八人○以野  
人大護軍朴也郎哈為上護軍 賜緜布四匠以報變從征也  
司正童之毛老都介副司直護軍於乙遊巨大護軍副司正升  
尚卧伊郎李加乙愁司正指揮老羅老萬皮哈兒迷副萬戶甫  
乙道抄陽可甫多只於虛朱阿陽介下乙炸伊副司正指揮僉  
使倒羊副萬戶以報變也○癸巳吏曹啓凡大小人真憚於早  
仕每衙日賀禮接見客人時移病不參甚為不恭請自今衆所  
共知旬日病外三朔內移病滿三日者令司憲府檢劾移關本  
曹啓聞罷黜 從之○咸吉道都節制使朴炯馳啓兀狄哈舌

豆等三百餘人作賊于高嶺居幹朶里兀良哈等處焚廬舍擄人畜殺浪三波之父三波請歸葬 上欲許之會兀狄哈來朝慮於中路復讎生亂止之三波固請 上議于左議政申叔舟且曰今來幹朶里兀狄哈等共處一館則慮或相閔叔舟對曰宜令三波歸葬仍賻之且幹朶里兀狄哈等若使分處則必生疑惑可速分運還送 命賻三波米八石紙三十卷布五匹○甲午 御忠順堂王世子 侍 命花川尉權恭為左廂大將兵曹叅議權愷右廂大將率入直軍士習陣恭用形名失律上曰恭大醉不可為將以兵曹知事李翊代之曰翊將大用者宜受大將之任以試才令左右廂合陣驅豕以觀打圍或為戰鬪之勢 御後苑命世子進酒曰予之鍾情不可名言汝欲報我莫若學問大抵文為貴不文則雖能武無用今日閱陣不忘備也豈黷為之耶予少事射御自在游藝祇為戲爾不足法也又曰今在側之臣皆竒偉人也不可泛然視之此天授非予容力所得也○丙申兀狄哈非舍等八人辭同知中樞李巨乙加

介行護軍浪三波等七人訴寃曰臣等自祖父歸順兀狄哈等亦投化而近者于豆澄羅等潛來高嶺行城底焚臣等本家殺害人畜盡掠財產又擄去臣等姊妹弟姪以復舊讎臣等憫焉今于豆同類來京臣等願見問之 上御慶會樓東偏房 召

見巨乙加介等曰汝等無乃欲報復乎昔宋憲之子要於路射賊以復父讎國家置而不問者以僻居遠道不知邦憲故也汝等知國家之法若効宋憲之子則子必不佩行司直童清周啓三波實欲報讎切齒今承 上教豈可方 命而行乎 上謂

巨乙加介曰申叔舟云汝之本家可以築城之地予欲築城備患何如巨乙加介扣頭謝曰如是則 上恩至矣謂三波曰汝

勿恨不得歸葬中道若遇兀狄哈則彼此勢難三波扣頭曰惟上教是從○丁酉有盜竊大慈庵二佛像腹藏 命閉都城門搜捕○戊戌日暈○御思政殿引見野人元好時乃等四十三人命禮曹判書洪允成績于本曹○日本國一岐州護軍藤影繼遣子來獻土物○同知中樞院事河漢卒 賜賻奠謚剛莊

強毅果敢剛勝敵志壯莊○己亥以金吉通同知中樞院事黃海道觀察使權攀花山君任淑司憲持平○命都鎮撫權恭禮曹判書洪允成率軍士搜捕大慈庵賊僧俗并六人其一司憲掌令李埤婢夫也得賊賊于埤家命囚埤及妻子于義禁府○吏曹啓司憲府監察只二十人諸司分臺常患不足錢穀出納因此遲滯請設兼監察五人以成均注簿一承文院副校理一世子衛率一訓鍊注簿一通禮門通贊一推移兼差從之○禮曹啓前此居喪人負承名則以淡服詣闕請自今起復人及居喪者承名則到闕門外著吉服以入從之○尚州牧使金守溫上書極言徒民之弊留中不下○庚子傳旨義禁府曰大慈庵賊僧保明俗名仲山及黃小生在逃有能捕告者重賞如有藏匿後現者與同罪其通諭中外○辛丑中樞院使竒虔率虔竒顯之後性清簡貞苦細行必謹好讀書嘗守延安以郡民進鯽魚困於捕網三年不食又不飲酒及適還父老錢之虔終日飲不醉父老歎曰今乃知為吾民不飲耳又安撫濟

州民病呀貢鯁魚亦三年不食鯁歷數道觀察使大司憲呀至  
有名謚貞武清白守節貞刑民克朕武○以汝吾里住司直金  
伊郎哈金毛下為本處副萬戶時錢住指揮廢鎖失哈本處副  
萬戶訓春住司直設好叱家倒羊者羅老萬皮禿里兀阿多幹  
大受能本處副萬戶吾弄草住哈兒速本處副萬戶具州住上  
護軍菲舍本處都萬戶余山住護軍劉尚尚哈陞授本處萬戶  
阿乙加毛端住副萬戶朴撒哈塔金探塔哈金撒魯哈朴阿堂  
吉陞授本處萬戶時未知住副萬戶李訥叱仇於陞授本處萬  
戶於知未住副萬戶金加加阿陞授本處萬戶吾音會住上護  
軍馬游德陞授本處都萬戶司直壹者三馬多弄可本處副萬  
戶會春住金沙仲哈本處副萬戶慈州住司直巨處本處副萬  
戶

世祖惠莊大王實錄卷第二十三

七年

順天五年

春正月壬寅朔

上御勤政殿受朝賀

御思政

殿召侍衛諸將及承旨等設酌

○癸卯 命義禁府保放掌令

李墀又放其妻子以盜佛像不知情故也

○甲辰前錄事李宗衍昵愛妻妓待重來踈薄其妻數歐之以至於死只有一女付

奴送于田莊 上聞之 命義禁府囚鞠令養其女子友婿鄭

潔家宗衍即盧物載女婿也

○上與中宮韋貞懿公主第問疾

○戶曹啓經國大典貢物聽兩相情願代納守令依定價收給

若勒令代納及倍從收價者不告官擅便收價者並以制書有

違律論價物沒官謄錄九貢物並限翌年六月畢納其代納者

須受諸司畢納文牒方許收價違者其價沒官立法詳密守

令不聽民間情願勒令代納代納之人不納貢物先收其價與

利人固不足論守令不遵立法甚為不當請自今貢物陳省具

錄代納自備一依立法施行如有托以自備潛行代納或從干  
請違法作弊者勿論赦前隨即罷黜 從之

○乙巳夜 命左

承旨金從舜左副承旨柳子煥 召禁義府部廳羅裕善問曰  
盜佛像者何不速鞫裕善失對即令囚于內兵曹○日本國肥  
前州上松浦那護野寶泉寺源祐位上松浦呼子一岐州代官  
枝山帶刀源實各遣人來獻土物○丙午 御思政殿 召臨  
瀛大君璆左議政申叔舟左贊成黃守身及侍衛諸將承旨等  
令叔舟問羅裕善曰汝之鞫盜甚遲緩而強辯以對汝實自以  
為 無罪裕善對曰臣於 上前素未進退當下問時兢惶失  
措罔知所對也 傳曰汝實非而強以為是宜即科罪姑赦之  
仍設酌 賜宣傳官酒 命守身吏曹判書具致寬左承旨金  
從舜往義禁府鞫盜佛像者又以金連枝為義禁府提調叅鞫  
御忠順堂觀射○鎮撫李晨道遇監察等以馬鞭歐辟除所由  
奪頭巾監察等避嫌 命刑曹鞫之○丁未 諭忠清全羅慶  
尚道觀察使敬差官等曰將徙居江原道者並分送于平安黃  
海道○諭咸吉道都節制使朴炯曰韓朶里向化李巨兒帖哈  
浪三波等言臣族類住高嶺等處者効順於國今被兀狄哈等



侵掠焚燒家舍不能自存請於高嶺長城外附築土城出入耕種以安其生即速親審地勢廣問情願以啓○傳旨兵曹曰捕告盜佛像者壯勇隊李貴敦等依捕強盜例賞職○戊申日本國肥前州上松浦九汝島主藤原次郎遣人來獻土物○己酉兵曹據慶尚右道教差官趙之夏啓本啓補充軍等雖未去官已付良籍其富實者請並徙居并諭他道從之○壬子承旨等以 上未寧請停 親祭園丘 傳曰予疾不甚苦第觀明日證候有頃 傳曰宗廟春享大祭令王世子攝行承旨等啓宗廟既令世子攝行以園丘在郊外不可觸冒風寒請亦令世子攝行 傳曰吾不與祭如不祭 宗廟園丘皆欲親祭○承政院啓正朝會禮宴饌物已備而停之請 賜成均館儒生御書曰饋入直軍士○戶曹啓國屯田之法載在六典而獨於平安道郭山安州三和黃海道黃州遂安康翎咸吉道定平德源江原道連谷三陟襄陽高城蔚珍置之自餘諸邑則時未置焉請令諸道觀察使依大典擇荒閑可耕之地作屯田如無

則以屬公田及絕戶田為之具錄結負之數以啓如有不用心  
觀察使守令痛行斗理 從之○癸丑尼麻車兀狄哈上護軍  
也多好等來獻土物○有人盜承政院文籍 命搜索本院及  
校書館奴隸家獲三人以啓 傳曰如此則有庫有藏之意安  
在蓋責典守之不謹也○甲寅 親傳永寧殿香祝 上詣  
宗廟齋于齋室 御扎曰大禮必簡者欲盡其誠敬也煩則怠  
隋之心生故貴乎簡速俗人不知以徐徐為敬是專不知為慢  
傲也可諭執禮及諸執事駿奔○乙卯 親祀 宗廟○丙辰  
親祀圜丘 還宮百官陳賀不受 御忠順堂 召宗親宰  
樞承旨設小酌又 銜麟趾堂設酌○元良哈都萬戶柳要時  
老等來獻土物○丁巳 御勤政殿簷下設飲福宴宗親宰樞  
及諸獻官執事倭野人等侍宴青城尉沈安義帶白羊角帶似  
玉 命改他帶 賜大臛于倭野人又 賜軍士酒○召宗親  
宰樞承旨等于交泰殿設曲宴又 召直藝文館金德源講中  
庸○諭咸吉道都節制使朴炯曰高嶺之戰卿輕舉我軍死者

數人遂與兀狄哈結讐然方委卿以重任不之責焉卿其知之  
今賊自知力寡方謀多聚其黨為我計在乎離之而已或因便  
傳語兀狄哈等使知高嶺之戰實疑兀良哈等為賊耳非為汝  
等也或以書契諭之然不可令彼知我惡其相合又善撫近處  
効順之人可也今言于豆等與兀良哈連謀者是或自大之言  
也是亦不可不審而處之然臨機設施特在於卿卿與康孝文  
共議行之又 諭平安道都巡察使金碩都節制使黃石生曰  
同封朴炯啓本及 諭朴炯事意卿亦知悉雖不可不嚴隄備亦  
不可先自疲弊○咸吉道巡察使康孝文馳啓事變 夕 上  
與 中宮御忠順堂觀放火砲○命還給姜尚甫洪貴海告身  
○戊午 召左議政申叔舟兵曹判書韓明澮禮曹判書洪允  
成都承旨成任等議咸吉道事變遂 諭都節制使朴炯巡察  
使康孝文曰今聞卿等欲攻朴加別羅等處賊若能掃除窟穴  
一大快也然今賊聲言歸順赴京之人方還宜姑停攻伐之舉  
徐觀其勢方春農作聲言入攻使不得耕種至秋又芟刈其禾

則不出數年賊必因而誠服此實長策賊若自來則應之不難  
卿其知悉○尼麻車兀狄哈等知劄里等八人辭還在道令成  
均司藝李繼孫馳付書契其書曰禮曹判書洪允成敬奉 王  
旨于豆澄乃等來攻吾弄草韓朶里之時邊將誤疑為兀良哈  
遣兵欲招問之于豆等亦誤疑韓朶里請高嶺之軍而追之彼  
此不知情實遠與之戰予已治邊將之罪于豆等特出於誤疑  
耳本非欲與我軍戰也予不之咎爾禮曹諭報于豆等使勿疑  
懼爾于豆澄乃等具悉 上旨歸順朝見如舊○加吏曹判書  
具致寬階崇祿康紘成吉道都節制使致寬性嚴毅庶簡門無  
私謂秉政數年人無間言○己未 御忠順堂觀射○諭平安  
黃海江原道觀察使啟差官等曰今農時已迫徙居人等已離  
本道者外並令停行以待秋成事已諭下三道其已到本道者  
依前事目存恤其姓名只所居地名所受土田結負具錄以啟  
○庚申 御思政殿受堂參視事 召左議政申叔舟及二品  
以上設酌○咸吉道郡體察使具致寬黃海道都觀察使金吉

通等辭引見命致寬進酒 上謂致寬曰卿節制平安鬚鬢  
稍白今往咸吉心甚靡安然邊事至重不得不已 御忠順堂  
召叔舟及諸宰樞餞致寬 賜物優厚 命刑曹判書朴元亨  
宦官安璐往餞于普濟院 教致寬曰命卿體察咸吉軍務其不  
從卿之節度者可軍法從事 諭咸吉道巡察使康孝文曰  
今以具致寬為都體察使以卿為副卿宜體悉 諭咸吉道都  
觀察使鄭軾都節制使康純曰今命具致寬體察道內軍務卿等  
以下諸將聽致寬節度○刑曹啓忠清道觀察使啓本啓燕歧  
縣監徐峻盜用軍資米豆二十石換馬雖已服招然守令犯  
賊者更量錢穀之數如有虧欠則並稱盜用例加杖訊請自今  
盜用情迹明白者啓稟杖訊 從之○辛酉 命左議政申叔舟  
議銓注以李純之知中樞院事金師禹判漢城府事李石亨刑  
曹參判咸禹治中樞院副使任孝仁忠清道都觀察使洪益生  
慶尚左道都節制使朴大生慶尚右道都節制使時議以有武  
才宰相當任吏治使諳條章故除師禹是職如是者頗多○戶

曹據江原道觀察使啓劄啓本道比因年歉民多流亡故募下  
三道之民以實之然舊民之流移者無禁故無補於事前此本  
道流離者各於所至處錄籍請令觀察使錄其年甲容貌移牒  
轉令下三道觀察使考錄籍窮搜以聞且流移之人隱於土豪  
及鄉吏之家刷出為難令徙居人陳告准丁許免其里正戶首  
隱匿不告者依律科罪從之○諭咸吉道都體察使具致寬  
副使康孝文曰今悉所啓金波乙大及將家奴父于老哈之家  
欲並攻之金波乙大前既以効順免之將家奴亦方侍朝不可  
並攻○壬戌上親傳先農祭香祝○御思政殿召都承旨成任  
傳曰速選可習兵要者以啓令校書館印兵要二百件以賜講  
習者○御忠順堂設酌宗親宰樞及成均大司成徐岡判奉常寺  
事任元濬等入侍上步至後苑使李純之等相構茅亭之基遂  
御翠露亭池邊命岡元濬等講兵書莊老子韓文等書又  
御扎出題曰御翠露池邊與宗宰論治道命元濬賦詩時天大  
風明日又欲習陣元濬製進曰玉輦時遊太液春天風吹下掃

輕塵日斜未罷論經理又擬明朝閱武臣岡於進講時語及釋教是非妄以釋教治心之事強其所不知文飾以對上欲觀其意連罰數爵問醉否對以不醉強自辯論上怒反覆究問岡語甚不遜上曰此物正是河緯地之流剛高聲對曰上教至是臣何面目齒縉紳間有死而已執御裾自訴不已還御忠順堂傳曰岡狂於貢高輕蔑君父罪莫大焉時日已昏宰樞等皆出命宦官林童嚴敬之等杖岡三十餘度令成任問不敬之情岡率爾厲聲對曰臣在家常閱內典上曰岡所答皆非所問尤有罪焉入令別監杖十餘度而止任等出縛置岡手後苑○御札諭咸吉道都體察使具致寬曰未遣卿時憂心不置既遣卿後樂心油然而何也卿知勝負之故故也雖然翻有憂慮我雖勝而驕彼雖負而慮故其勢難一故也一勝一負兵家之常其勢難二故也卿雖知故麾下將士不知其故安能去驕其勢難三故也卿更察此三故則彌天之功不求自成大槩有三一則知足不為己甚貪功是也二則不輕敵是也三

則相時而動勿輕舉勿重舉勿必攻伐勿必不攻伐深如淵動  
如雷無詐無愚權以佐智是也卿諦予諭一字非虛知卿不言  
而信○癸亥承政院啓昨徐岡於 上前無禮莫甚請下攸司  
鞫問治罪 傳曰岡罪當置極刑召兵曹判書韓明澮都承  
旨成任 傳曰岡以小臣凌辱君上要以釣名罪在不赦往者  
河緯地成三問等常以諫爭為名悻悻自高遂至反逆岡亦其  
流也予欲置極刑否則將永屬于濟州官奴卿等以為何如明  
澮對曰允當○司憲府啓安孝禮丁父憂謀欲冒得人奴婢釋  
裘著吉服擅入闕門其敗常亂俗莫此為甚按大明律喪未終  
釋服從吉者杖八十擅入皇城門者杖一百然孝禮罪在十惡  
無父之心漸不可長若依律輕論則無以懲惡請收告身遠流  
戒後以功臣 命只收告身配外方孝禮本典農寺胥吏業陰  
陽風水學仕書雲觀妄執自是務勝於人中庚辰武舉 上以  
併優畜之○傳旨吏曹曰趙孝山妻祥原郡主寡居貧乏其兄  
鎮南君終生不調恤其罷職○刑曹啓前僉知中樞院事崔



興孝妻閔氏同產弟前注簿閔成麟到閔氏家手執閔氏頭髮  
曳出于路多有傷處及其取招元拒不承甚為姦惡請收告身  
囚鞫從之○義禁府啓及第李淑城奸友人吳尚文妾今生  
罪杖八十令生杖九十從夫嫁賣及第吳尚文未知其實臆意  
作傳罪杖八十聽奴子疑說誣張仲孫為奸夫作傳罪杖六十  
徒一年命以赦前並勿論○甲子上幸東郊觀放鷹謂左  
議政申叔舟曰徐岡以小臣陵辱君上言涉不恭罪莫大焉予  
欲置重典所以遲之者三思耳又顧謂左右曰諫宰樞等宜知  
此意至松界平駐駕進酒二品以上入侍駕還入成均館  
謁聖御明倫堂御札出題云百王之師垂法萬世二帝三  
王之所不及處何也進士金順理等製詩以進遂幸永膺大  
君琰第至昏還宮○乙丑日暈○御忠順堂聚成均館四學  
儒生於後苑凡五百六十餘人以領議政姜孟卿左議政申叔  
舟禮曹判書洪允成吏曹參判李克堪為讀卷官判司贍寺事  
任元濬藝文應教金壽寧為對讀官出題云我國西北虛而東

南實今欲徙民於西北而民皆重遷願聞徙民樂遷之策賜  
諸生紙札令於紙尾只書姓名緊卷元濬壽寧等請糊名諸學  
士皆曰不必區也克堪獨以為國試不糊名非古也二人之言為  
是竟依舊例命允成率三館督收諸生卷子大叫亂之上  
曰我則鼓譟而彼不怯真勇士也且儒生中如有欲射者可射  
俟幼學金致利朴自峴射中鵠命允成錄姓名年甲以啓進  
士成倪先製策以進上覽而褒之仍講論語倪粗解大義  
上曰可賜倪及第命右副承旨金國光封倪卷子謹藏待  
出榜日更啓試官等請留宿闕內上曰大臣無嫌出宿  
私第明早入來○戶曹判書曹錫文嫡室無子婢妾有子嘗  
命婢從良令錫文辦宴饗諸宰樞是日錫文設宴于其第  
樂命都承旨成任左副承旨柳子燠賫宣醢魚肉就賜又  
命臨瀛大君璆翼峴君璉寧海君瑋烏山君澍龜城君浚青  
城尉沈安義往赴○諭京畿都體察使成奉祖曰以卿兼任賑  
恤使與觀察使同議措置又諭京畿都觀察使李克培○承

政院奉旨馳書于忠清道觀察使曰禮曹判書洪允成觀父子  
鴻山設宴慰之并致祭于母及祖父母外祖父母墳○丙寅日  
暈○取文科及第河叔山等三人又以生員柳洵柳自汾安良  
生成倪等四人所製稍優 命直赴會試金國光更啓倪卷子  
僉曰呈身取及第後來之弊不可言也國光曰已有 上旨倪  
策拙速不中程 上以年少可教欲並收之僉曰倪策雖好不  
合於格可許式年直赴會試 從之倪成任之弟也時任為都  
承旨國光為右副承旨○以金致利朴自崐為宣傳官○兵曹  
啓大小人負闕內根隨之數及胡跪之禁累次立法至為詳密  
然不顧大體或加率根隨或遇尊長輒行私禮習以成風非徒  
朝儀不肅殊無敬上之意請自今曹及鎮撫所嚴加考察把門  
者不禁并治其罪犯禁人降一資若功臣則附過勿論赦前三  
犯罷黜 從之○戊辰以李承召為藝文提學兼成均司成李  
暨工曹參議元志於權擊僉知中樞院事具達忠司憲掌令○  
兵曹啓平虜衛初以衣冠子弟補之及移屬甲士別侍衛時除

觀試直赴會試故各品妾產冒屬平虜衛以赴會試者多請自  
今會試須考顯官保單字方許取才雖已取才者亦考保單字  
叙用 從之○已巳 御札下議政府曰人臣諫君者其心見  
其非是而諫之者是直心也見其非是而不諫則是詐心也故  
諫者事君之大道也人主見其直心而過之則失君道見其詐  
心而容之則失君道故賞善罰惡御國治世之大道也今徐爾  
專不讀老子而毀之不問而闢佛曰糟粕是常不是君父而好  
名之心自不能防何詐如之若不正典則世道大亂下之訕上  
相尚為賢君臣大綱其誰能正之此非細故也可絞舍人鄭文  
炯將本府議啓允當即下 傳旨于義禁府處絞其妻上言岡  
獨子乞免死 不允義禁府啓岡訕上請依反逆律籍沒 不  
允岡登第入集賢殿累遷成均大司成性叢脞輕躁好辨論是  
非○吏曹啓學校風化之源不可曠廢今拜教授者視為寒職  
多方窺免不肯就職自今除授後無故過三月不就職者依見  
任朝官托故不行律杖一百罷職不叙其有辭避者依守令六

年不叙例三年不叙 從之○兵曹據忠清道觀察使開啓忠  
州丹陽稷山堤川永春清風延豐等邑失農尤甚請軍士於春  
等講武勿令扈從船軍限麥熟分四番防戍 從之○日本國  
對馬州太守宗成職遣人來獻土物○庚午日暈○傳旨戶曹  
曰趙孝山妻祥原郡主貧不能自存月給米一石○咸吉道巡  
察使康孝文啓鍾城愁州住元良哈也叱歹來告曰火刺温兀  
狄哈伐哈另哥歹哥稱歹等各率軍士七百餘名將寇甲山等  
處及平安道雖未盡信然亦難料且今諸種兀狄哈結黨乃於  
五鎮分兵來屯逗留不退勢若可信即令甲山整擗軍馬益嚴隄  
防且已馳報平安道 命示左議政申叔舟叔舟為書啓曰今觀  
聲息啓本賊欲多張形勢使我兵分乘間突入也然朴炯康孝  
文等已知其情必備應變之策不可從中遙制但尼麻車等實  
來則不可輕與之戰使堅黨賊之心今宜諭具致寬等因勢開  
諭尼麻車等使不與賊連兵姑勿輕戰何如臣竊料賊方出死  
力我兵厭戰賊聲分形勢而悉力攻我不意我分兵為備處處

力弱是可慮也為我計宜令諸鎮堡堅壁清野勿輕出戰徐觀其勢乘其疲怠都體察使都節制使以輕騎往來赴援可也并論此意於致寬等何如 上覽之即草諭書及事目諭成吉道都體察使具致寬副使康孝文曰今觀聲息啓本賊欲多張形勢使我兵分乘間突入也然兀狄哈等實不欲與我作讎故言朝鮮兵勿出若輕與之戰則徒使兀狄哈益堅黨賊之心今宜因勢開諭兀狄哈曰國家無負於汝而汝信汝讎之誑言輕犯大國利害若何吾非不能與汝角手但以時無上旨故商量耳勢不得已則何待上旨然則汝代人受毒矣可更思之如是開諭使不與兀狄哈連兵姑勿輕戰又料賊方出死力我兵厭戰賊分形勢而悉力攻我不意我分兵為備處處力弱是可慮也為我計宜令諸鎮堡或堅壁清野或撤聚并守勿輕出戰勿爭小利都體察使副使都節制使以輕兵往來赴援可也萬一賊雖小得以去勿為姑息之爭當為大勝之遠計朴炯則可用者也卿其任使之前日都體察使詳知予意而去又康孝順賫去諭

書示意詳悉兀狄哈兵解之後意謂必有攻兀良哈之勢卿熟思善處盡兵家之變通毋局於造制並審同封事目一尼麻車兀狄哈非沙劄里等因朝見而來不干於賊今使之聞諭諭書事意於亓豆澄羅右等勿令與賊連兵可也若拘留薄待則益成嫌怨必生變故當厚待以送一尼麻車等雖與兀良哈或有連姻往來前日諸姓兀狄哈攻阿赤郎耳之時尼麻車亦與焉今尼麻車之來特憤高嶺之戰與我之庇護幹朶里乃為兀狄哈所誘引耳非真與相會也今觀啟本尼麻車不欲與兀良哈合兵今且別屯其心不相合益明矣自古夷狄連兵者皆以利動非以誠也不久而必自生疑貳一退則一不能獨留勢之然也唐太宗以香火之言間突利慕容廆以牛酒間宇文氏是皆不過用間以離之而已今因非沙等往來澄羅右之處量致犒饋以示慇懃之意彼必感而心動且我聲言兀狄哈與我夾攻兀良哈則兀良哈聞之亦不能不疑此用間之時也用間非獨此可因勢而行一諭澄羅右等以夾攻兀良哈之軍立大功受厚

賞以報。殿下厚待之意則貪利之徒必生心焉。黨賊無利則  
焉有不翻覆之理乎。一使如非沙之輩數數往來傳言則兀良哈  
不能不疑。且聲言與尼麻車夾攻兀良哈之軍使相疑。貳亦一  
間也。一聲言兀良哈等怨前日諸姓兀狄哈攻阿赤郎耳時尼麻  
車亦有與者。今假與之合報。雖朝鮮後與幹朶里之在東良等  
處者邀其歸路而盡殺之。使尼麻車聞之亦一間也。一尼麻車  
若又言出送幹朶里則當直答曰。幹朶里之居城底者素効順  
於我。今以窮來豈可捕致於汝。是猶尼麻車之人來在我者。幹朶  
里請得報讎豈可許之。以負尼麻車歸順之誠哉。汝等思之可  
解也。如是誠直言之可也。一尼麻車若強求幹朶里之在城內  
者。當答曰。幹朶里在東良等處者多。汝何不攻此輩以復私讎  
而反為兀良哈等之所使乎。正如奴僕耳。何不乘此敗亡之時  
與我夾攻。一則効功於國。一則得人物而作奴婢。豈不利乎。兀  
良哈請汝之意。汝不知乎。一以報自讎於朝鮮。一以使汝等構  
讎於朝鮮。以紓己患。成汝實禍。自為善計耳。汝猶不聽於國家。



不怒之時而當國家既怒之後汝其安處乎汝更思之一所欲  
急攻兀良哈者以盡敗無勢力則兀狄哈不足數矣豈為之連  
兵哉是則急攻良策也然兀良哈兀狄哈皆野人同類者也故  
雖舊讎嫌而相合之勢易我若急之則其合也堅緩之則其  
離也可待今雖有攻兀良哈之幾姑忍不動俟時而動未晚也是  
則不攻良策也以此二策擇而用之又示叔舟叔舟啓曰允當  
傳曰明日當與姜孟卿韓明澮成任議之○兵曹據金羅左  
道叡差官金好仁啓本啓王果應募人李伯孫其妻千從死奸  
其弟從伊因以為妻行同禽獸敗常亂俗且虛張奴子之數以  
應募欺罔國家姦詐為甚不可不懲然伯孫功臣不可治罪請  
屬兩界殘驛吏以懲其惡且終伊淫醜無比勿論赦前治罪  
從之○辛未領議政姜孟卿左議政申叔舟兵曹判書韓明澮都  
承旨成任等詣賓廳議應變之策 傳曰咸吉道諸鎮諸堡守  
護之處不一兵力之弱靡不由此其不緊諸堡撤去守以強  
兵力何如孟卿等啓巨鎮之間設堡者欲其救援也若無救援

則雖巨鎮不能獨當中國有堡以此也又傳曰文臣雖職帶  
藝文館承文院者至於臨大事決大疑或有不能者非獨文臣  
也武臣亦然宜選文武可用者問其禦敵之策孟卿等選棟以  
啓御忠順堂召孟卿等侍食命名武臣柳興武成貴達  
辛鑄李經李德良趙宗智崔景禮尹末孫朴仲善文臣朴健順  
安寬厚盧思慎金壽寧田桐生申末舟等示事變啓本俾各陳  
方略傳曰若等方略稍得之遂以事目示之曰見此事目則  
可知國家禦敵之策矣又命德良賡諭書及事目往咸吉  
道謂曰命汝者欲憤邊事以為他日之用也賜弓矢至昏  
舟遣其弟末舟啓全送咸吉道諭書及事目令都體察使及李  
德良等秘而勿洩幸甚上曰可即馳書于德良知會又令說  
與體察使○諭平安道都巡察使金瓚都節制使黃石生曰今  
來咸吉道事變啓本及諭書事目傳寫下送卿其體審○日本  
國九州都元帥源教直對馬州宗茂次各遣人來獻土物○二  
月壬申朔諭咸吉道都節制使曰聞近者野人窮困頗有歸

順之意若一切絕之是無自新之路其告變及刷還人物有勞者如欲上京酌其輕重約其僣從以送○癸酉 御忠順堂

命世子與德源君曙永順君溥承旨等射候○咸吉道巡察使康孝文馳啓野人五百餘騎來屯東良等處不得利而還 召左議政申叔舟議曰兀狄哈本欲攻兀良哈今兀良哈又不得利於我而還其勢既摧可與兀良哈合謀夾攻○甲戌江原黃海平安道徙民安集都巡察使韓繼美辭 命饋之○諭咸吉道都體察使具致寬曰骨看兀狄哈最効順於我今以不得上京為怨必欲犯邊我國既與毛隣尼麻車作釁又與骨看不靖則備禦之力實多且慶興兵弱勢須招撫卿令如李多弄哈等可信人往諭曰今年上京者皆從軍報邊効力之人汝等益堅歸順之誠則當次次上京矣今若無故犯邊非徒盡棄前功必有後悔如是開誘招撫鎮靜略送頭首入朝彼雖聚兵而來勿輕與戰然兵家變通在鄉○諭忠清全羅慶尚道觀察使曰今徙居之民盡賣土田已上道而命留故居生業可慮其販賣土田

並皆還主其中雖有未盡還元價者限今年許本主耕稼本主  
徙居後買者執耕其以此意曉諭人民○江原黃海平安道都  
巡察使韓繼義事目一前事目內徙民農器令諸邑備給然不  
可猝辦用其道會計付鐵物造給一前事目內徙民等擇閑曠  
之地或十戶或十餘戶成里聚居今徙民數少若置於人家隔  
絕處則必不得安心過活令就元居富戶近處住居且閑地不  
足則給諸邑屯田令墾新田充之元居人侵虐新徙之民使不  
得安集者守令嚴加檢察並罪里正監考一徙民種食給義倉  
穀不足則量用軍資具由以啓一新徙人等風土不同易致疾  
疫令所在邑遣醫生救活觀察使亦遣教諭巡行救療一今已  
發程者令兵曹移文促之農前畢送如有滯送稽緩者勿論赦  
前以制書有違律論一自募人則從願入送勒令人則諸邑有  
定數今徙居者少並從願分置從之○詳定所啓文獻通考  
蘇軾曰古者坐於席故邊豆之長短簋簠之高下適與人均今  
土木之像既以巍然於上而列器皿於地使鬼神不享則不可知

若其享之則是俯伏匍匐而就也朱子曰夫子像設置於椅上已不是又後置在臺坐上到春秋釋奠却乃陳簋盞邊豆於地是甚義理宣聖本不當設像春秋祭時只設主祭可也今不可只得設像坐于地始是禮今文廟文宣王及配位神位並於椅上奉安從祀神位於高足長床奉安朔望祭則用卓子設奠物釋奠祭時奠物多而卓子小故用席鋪地而設東西廡神位亦於高足床奉安釋奠祭時席地設饌神位高而奠物卑正是古人所譏匍匐就祭甚為未安請自今各位奠物並用卓子而設除鋪席從之○兵曹據咸吉道巡察使康孝文啓本啓鍾城以北軍士及驛吏從征失馬者請以諸邑分養調習馬及擄來胡馬內兒馬雌馬老病馬分給從之○議政府啓新徙之民非徒風土異宜口糧不敷或生疾病請令觀察使遣教諭巡行諸邑救療毋致夭札如有致死者雖孩童即移文該曹考其多少科罪且勿欲往來故居者一戶一人給文引出送移牒其邑促遷從之○乙亥上御光化門相構鍾閣基○丙子親

傳文宣王祭香初○傳旨司憲府曰笠餅雲月兒大君用金堂  
上官以上用銀禁大白玉七寶交露金王雲月兒朱紅黃丹馬  
鞞白羊角釵帶○丁丑 新傳社稷祭香祝 世子率五功臣  
及親子嫡長等會盟其誓文曰王世子臣昉開國之社佐命靖  
難佐翼功臣及子孫等敢昭告于天地 宗廟社稷山川之靈  
勲盟之義自古莫重周謹盟載漢誓帶礪無非所以激勲臣之  
心世篤忠貞夾輔王室相與匹休于無窮焉耳今五功臣等或  
其祖父或乃躬親皆能攀附風雲同心共力除禍亂而開景運  
剪姦兇而定 宗社扶大命於沾危靖內亂於叵測以至翊戴  
聖躬誕撫瑤圖爰念勲勞之重特隆褒賞之典迺及後裔亦膺  
殊眷既已厚荷國恩惟當益懷永圖罄竭精忠不替素節誓心天  
地與國咸休臣宜率先與同盟好是用諏 日謹 率五功臣質  
諸昭鑑用申舊好凡我同盟之人自今以往各自策礪更殫赤  
心惟忠惟信毋貳母間子孫萬世毋忘今日其或有渝神明在  
上○傳旨吏曹曰會盟功臣及嫡長親子等各加一資資窮者

子婿弟姪孫中一入代加○諭咸吉道都體察使具致寬曰今見康孝文朴炯啓本具悉應變合宜前者下諭事目所以開其斟酌指揮之端耳非以為遙制也何拘於事目在卿節度進退耳會寧童關之戰有功者奇不賞卿其審覈以聞且賜宴孝文朴炯康純安仁厚以下有功將卒以慰其勞○諭平安道都巡察使金礪都節制使黃石生曰今來咸吉道事變啓本及呀荅諭書謄寫以送卿其審之○部將李繼禎往平安道香山拿佛像賊僧保明以來 命同副承旨洪應鞠其逃匿情由及經宿處下義禁府○咸吉道都節制使朴炯馳啓兀良哈等言童關之戰死亡者二十餘人人馬中傷者百餘若仍居此地則朝鮮必來侵伐皆移長白山北南羅貴之地 命示領議政姜孟卿左議政申叔舟叔舟為書啓曰南羅貴距伐引一二日程有大嶽隔之是為速平江之源賊既被攻討今又入寇奔敗其欲移居勢之必然臣聞其地與火刺溫所居甚近且不宜畜牧終不能安業其投順可立待也今移與不移於我無損當任其所為以觀

其勢孟卿之意亦然○火刺温兀狄哈上護軍照麟可等來獻  
土物○戶曹啓頃以平安黃海江原道軍需不敷募人納穀用  
下三道水邊諸邑軍資陳米豆雜穀准給咸吉道受敵之地軍  
需尤不可不備請依此例相換儲備從之○戊寅親傳風雲雷  
雨祭香祝○以李承旨為藝文提學○傳旨戶曹曰今頒降大  
典國幣條幣布一匹長三十五尺或以十七尺五寸為半匹此  
端須經官印京中司贍寺外方各其邑並經朝鮮通幣之印方  
許買賣經印時收稅二十分之一收稅從納者情願以三等幣  
准計通用然上項立法未盡自今收稅常布半匹楮貨一張常  
布一匹及正布半匹二張正布一匹四張以為恒式○己卯以  
河尹沙吾羅住上護軍照麟可為本處都萬戶○庚辰 上與  
中宮御忠順堂設飲福燕功臣仲朔宴 上吟前日 御製詩  
句右議政權擘和進曰先醉婆娑是病身顛狂竒態老尤新一  
杯一杯情何極願獻 兩宮壽萬春 上覽訖 命進酒令侍  
宴宰樞皆和之○諭咸吉道都體察使具致寬曰同封事目卿



宜斟酌施行一康孝文啓本云賊欲移南羅貴今賊既屢犯而  
敗恐我再攻其欲移竄勢之必至然南羅貴距會寧鍾城非絕  
遠而距海數百里無從得益其來投可期也來者撫之移者任  
之賊者攻之以觀其情丘冢形勢予所不知任卿處之一康孝  
文啓本云尼麻車之還自說與朝鮮無隙今宜因其勢而善  
撫之使不疑貳幾不可失一前聞骨看有憤言論卿令李多弄  
哈等往諭之且上送頭頭人今康孝文啓本云已令多弄哈往  
諭之骨看皆辯明不敢如是今更思之彼見我邊境多事故為  
危言以要上京也今姑廣諭厚撫徐觀其勢有不得已然後送  
之一本道軍士屢立戰功而兵曹以考前職猶未行賞督令施  
行今會寧童關之戰有功將士卿等宜即等第並錄前職以啓  
○壬午日暈○幸免只山觀獵獲二虎○癸未 御思政殿引  
見兀狄哈照麟可等 上曰汝等之來路經兀郎哈地面見汝  
何言對曰只見老弱守家者 上曰守家者有禁汝出來乎對  
曰有斜的者止之我語之曰汝等作賊我則慕德安敢不往

上曰汝聞兀良哈自取攻伐乎對曰已聞之矣 上曰兀良哈等愚蠢不思我撫恤之恩屢犯邊鄙故已令直擣巢穴今若更來作耗則將使珍穢無遺彼若逃竄向汝地面則汝或為奴婢或綁縛以來我視遠人如吾赤子皆欲厚待汝與兀良哈何異哉彼若改過自新誠心歸順則待之如初汝將此意反覆開諭兀郎哈及汝之同類俾知我待遠人之意今汝再來嘉尚無已今將日暖汝同類有欲來見者可待秋涼仍命進酒○鍾城節制使金嶠辭 上引見令進酒因與嶠及楊山君楊汀論制敵之策汀對稱旨 上曰真將材也謂嶠曰汝往之鎮多造角弓汀啓咸吉道魚膠稀少難以多造 命給軍器監魚膠三百斤又命嶠進酒賜襦袂衣各一襲○諭咸吉道都體察使具致寬曰賊之欲為邊患者不過嘯聚諸落或誘之以利或激之以怒以相結耳今既窮縮或欲逃竄或欲犯邊或欲歸順其情不一今若急之則結他類為倘緩之則必自解矣大抵攻夷狄之策在乎開自新之路以離之因其離而收其功今卿審其情勢苟

有投順者因而撫之雖佯言歸順亦當撫之如舊或使自中効  
功以自雪使賊知歸順之利則為惡者必少孤立寡助矣○御  
札諭平安道都巡察使金礪曰卿率京軍士以來其餘軍士盡  
付節制復黃石生○甲申 上與中宮御交泰殿永膺大君琰  
進豐呈○傳旨戶曹曰延昌尉安孟聘俸祿今春等為始依他  
頒給喪後各等祿俸亦皆追給○乙酉平安道都觀察使曹孝  
門馳啓野人李豆里古納哈等到滿浦言火刺温兀狄哈加昌  
可率三百餘兵屯于他郎哈川邊將寇朝鮮古納哈止之曰曩  
者毛同果作耗朝鮮因此加兵於我汝等今若作耗則必乘攻  
伐加昌可等引去且言吾等厚蒙 上恩常欲如京陳謝須將  
此意啓達 命示左議政申叔舟叔舟啓火刺温聲息真偽不  
可知豆里等稱為告變而來不可絕之且既攻東北宜撫建州  
今速遣朝官教豆里等曰汝等不忘予憐撫之意遠來告變且  
欲朝見予嘉汝誠然中國忌汝等往來於我不敢相接然汝既  
不忘我恩予亦知汝之誠不必面見將見中朝指意耳茲為遣

人曉意汝宜體悉仍設宴厚饋量賜衣服貨物以遣且古納哈  
 禁火刺温作賊真僞亦不可知然其言如此小可不論功以結  
 其心今因豆里等量致賜物諭旨又令諭滿住童倉等曰今毛  
 憐之人作耗於我汝等不可連結容接以貽後悔 上曰可○  
 以宋益系僉知中樞院事○兵曹啓舊法兩界子弟用其道觀  
 家使薦狀授軍職兩期相逆然其子弟不擇賢否專以薦望除  
 授甚為不可自今有武才可備近侍者咸吉道五人平安道四  
 人令其道觀察使節制使同議揀選啓達後一年相逆授職兼  
 差司僕 從之○开曹啓比年以來盜賊興行良民受害因此  
 累建條章然姦暴之徒猶幸法律之寬竊發自恣略無畏忌以  
 至羣聚搶奪民之受弊比古尤甚請搶奪及竊盜者依牛馬賊  
 再犯者例自今辛巳五月初一日以後再犯則通計赦前不分  
 首從賊貫多少並皆處絞 從之○丙戌日暈○御忠順堂  
 召都承旨成任入直諸將等議定講武時侍衛宣傳官衛將部  
 將命吏曹叅判李克堪離校北征錄右副承旨金國光詳定新

刑典○平安道都觀察使曹孝門馳啓野人伊澄哥等五人來  
言火刺温兀狄哈等將於東八站邀截朝鮮赴京回還使臣且  
言我等欲上京朝見邊將不許曰汝等往來中朝忌之不可上  
京乞以此啓 殿下命台申叔舟金從舜韓繼禧李克堪等議  
待野人之策 傳曰今豆里伊澄哥等來告聲息不知虛實而  
輒遺衣服貨物則雖得一時之喜後日告變者必援此為例希  
求厚賞末流難支况贈衣服鞍馬本是中朝所忌則贈送無乃  
不可乎古納哈親禁火刺温作賊亦未盡信且不親來還贈衣  
服則示弱莫甚但遣朝官諭以汝等往來中朝所忌不可來朝  
仍設宴饋送何如叔舟啓 上教允當然臣意以為野人多慾  
賜物則感恩不賜則含怨自攻東北以來建州之人皆疑待我  
如何今若薄待則恐生嫌隙又古納哈禁火刺温作賊雖未的  
知我當佯信其言以觀其勢 上御慶會樓東偏房召謂叔舟  
等曰卿言甚當予意以為衣服鞍馬贈給中朝所忌則贈之不  
可也今若為遣朝官多贈衣服貨物則後日援例者必多國家

待之一不如意釁從此起今遣朝官設宴慰之仍言深嘉汝等  
欲來之誠然汝輩往來中朝所忌故不許上來以此開說無乃  
可乎叔舟對曰上教甚善遂諭曹孝門黃石生等曰今悉  
所啓火刺溫聲息及古納哈禁賊虛實未可知也然彼既以告  
變而來不可截然拒之且既攻東北宜撫建州今遣成均司藝  
金永濡賚事目諭之仍設宴慰送其事目一宣諭豆里等曰汝  
等不忘予憐撫之恩遠來告變且欲朝見予嘉汝誠然汝等往  
來於我本是中朝所忌不可上來觀中朝指意許其來朝未晚  
也茲為遣人曉意汝宜體悉如此開說設宴厚饋又語之曰汝  
等累次遠來輸情滿住累遣子弟朝見又數報變童倉親來朝  
見曾在會同館見我使人云不忘聖恩情語懇到古訥哈累  
次親來輸款今又親禁火刺溫作賊遣親弟女督報變予嘉誠  
意非不欲厚賞以答其誠然以中朝所忌不果予甚恨之非徒  
汝等建州之人俱不與賊連結予所憐撫汝宜體悉曉諭同輩  
永安生業一今因豆里諭滿住童倉等頭頭酋長曰火刺溫素

無嫌隙於我今欲作賊必為毛憐衛之人所誘耳汝等復安舊業受子厚息宜思遠計勿連結毛憐衛又勿容接逃散之人以貽後悔毛憐衛之人既背我恩屢犯我邊我不得已攻其巢穴今毛憐衛人若以誠歸順則子當撫之如舊不然則子當極我兵勢汝等知悉勿與賊連結助我攻伐一豆里等若已還事目傳付都節制使待他日更來語以為遣朝官之意且依事目辭緣開說饋送一饋餉後邊將以自意依前例贈物若有不可不優給之勢則隨宜優給 上命克堪從舜繼禧賚事目及諭書草分往姜孟卿權擘韓明澮第議可否擘明澮皆曰 允當唯孟卿之意稍異 上曰明曉速遣金永濡又 諭孝門曰謝恩使宋處寬等回還時抄發義州旁近諸邑甲士五十名整擗器械義州口傳軍官及道內軍士中擇有材略可將者領率送至遼東○丁亥 諭咸吉道都體察使具致寬都觀察使鄭軾曰今來平安道啓本及回荅諭書事目騰寫以送卿其審之○承政院奉旨馳書于咸吉道都觀察使曰今送種竹方擇識理

人分明教誨送江原道有箭竹處依方採之船輸本道宜竹之地用意栽植培養并審同封事目一擇高平向陽之地北邊東西築牆使陽氣不散溫暖自倍然後依方傍兩種之一種竹後成長之狀依甘草例每歲抄啟聞一今送方書及事目謄寫令種竹諸邑永永遵守○戊子遣通事金自海賚咨往遼東其咨曰近體知得建州衛住諸種野人累次奔敗逃竄謀欲於東八站山路潛往藏躲等候本國朝貢往回使臣闌截報復自今適當進賀正朝及進鷹謝恩等項使臣回程日期慮恐本賊乘機竊發擬合移咨添撥軍兵護送相應承政院啓今咨文內有稱建州衛住野人闌截報復等語臣等以為邇來建州衛人與我國無嫌每來告變今斥本衛人往訴遼東則彼聞之必自懷疑貳毛憐衛人聞之必藉此為辭扇動建州請改之上曰幾誤大事速改以啓乃改建州衛住為比前作耗闌截報復為邀截搶劫○承政院啓前日尹子雲赴京回還時遼東大人耿和請強弱弓各二箭竹二三百箇今次金自海之行若問賚來與否將



何以荅 命議政府議之領議政姜孟卿左議政申叔舟左贊  
成黃守身左叅贊李承孫等啓耿和守邊之將不可遺以弓箭  
上曰頓不可許也予試大臣議耳當荅云軍器不待從請但前  
日有贈弓之例則小得已而略送可也更議于政府孟卿叔舟  
承孫等啓 上教允當守身啓曩者王祥在遼東時有送弓之  
例今宜從耿和之請 上從孟卿等議 傳于承政院曰弓與  
箭竹姑勿送○兵曹啓前此受教武科勿令鍊才令武科及係  
干武人等講兵要兵政將鑑博議武經陣書通鑑取二十一人一  
等三人二等七人三等十人其論賞節次一依都試例請自今  
不拘多少上項十二書內通五略三粗二以上者為一等通四  
略三粗三以上者為二等十書連畫者為三等隨等論賞 從  
之○諭平安道都節制使黃石生曰兵法不可言傳不可手授  
要在臨機制勝耳古人云權不可預議變不可先圖况兵難遙  
度乎卿其盡心○己丑 御思政殿引見兀狄哈照麟可等曰  
曩者具州兀狄哈來見時諭伐兀良哈後果來攻今汝等既聞

我命亦宜助我攻伐照麟可對曰嘗有元良哈到我境者我乃殺之 上曰彼背息逃往汝能殺之可嘉前日子之所言汝能記耶照麟可對曰何敢忘之 上曰汝今再來朝見深知予意宜悉傳于汝之同類予方欲曉意於火刺温汝今適來其悉傳予意又曰元良哈今若歸順則當撫之如舊今乃逃居南羅貴汝宜攻伐照麟可曰惟命 命進酒賜物有差○庚寅御忠順堂觀射設酌宗親宰樞承旨等入侍○辛卯日暈○臨瀛大君璆設宴于其第 命左承旨金從舜賫宣醞賜之○梁山君李澄石率停朝市致帛祭澄石有勇略自 世宗朝歷任邊鎮士率信服得與佐翼功臣謚莊剛勝敵至強莊彊毅果敢剛○壬辰御忠順堂召吏曹參判李克堪右副承旨金國光更校北征錄召刑曹判書朴元亨議刑獄○命左副承旨柳子煥同副承旨洪應 召講武時隨駕宣傳官等講兵政及用形名節次○司憲府據全羅道都觀察使關落長城縣監權得宗以官米遺女胥官布易鞍子賂遺大臣及政曹郎官令本道觀察使覈之得

宗逃匿非惟現賊其他盜物必多請遣行臺搜捕盤問并鞫觀  
察使差使貪不即檢覈之罪 從之○癸巳 御忠順堂觀射  
宗親等入侍○黃海道平山府使鄭次恭獲白鹿以進○慶尚  
道都觀察使金淳馳啓對馬州太守宗盛職書其書曰日本國  
因大風大水之災人民飢饉死亡者多聞大國年豐咸仰大國  
買賣以資生利其中如有惡逆無道之輩向貴國之人致惡謀  
者宜直行罪過絕彼之命 上疑倭人流離者擾邊即以郭連  
城為慶尚右道都節使權權處置使○元良哈汝羅豆等來獻  
土物○甲午日暈○京畿都觀察使李克培馳啓今徙居人  
等到樂生驛者男女共二百二十八人良才驛者二百六十九  
人輜重馬牛倍於人數其傳領諸邑人民久事轉輸人畜俱困  
遮路呼泣可憐悶巨竊計今當農月仍使貧民轉輸則非惟道  
內人民失業徙居之人未就新居農節已過恐失生業請雖已  
離本道者并還故居待來秋入送 召左議政申淑舟兵曹判  
書韓明滄議之叔舟啓令徙居人自輸輜重則無力可致仍令

諸邑人民轉輸則果如克培所啓不如速遣朝官發還故居諭  
以待秋而遣之之意仍勿守令察訪不即遞送之罪又諭慶尚  
全羅道觀察使使之安集 上曰宜速發還 上軫念徙民失  
業欲永免徙居明澮啓徙居人等僥倖停止之命故自淹留今  
果停之則是墮民術中矣况自樂生視之則黃海道近而慶尚  
全羅道遠且舊居田宅已賣於人今雖復往與黃海奚異不徙  
民則已如不得已不可中止 上曰然則如之何明澮對曰輜  
重則多發船艘由水路輸送令徙民男丁押去其餘家累由陸  
路而送何如 上曰然即 命工曹漢城府司宰監督發船艘  
謂明澮曰此則重事卿親往無弊措置○諭平安黃海道都巡  
察使韓繼美黃海道都觀察使金吉通曰近者徙居人等留滯  
良才以南諸驛若由陸路則農事失時誠為可慮今由水路而  
送至白川延安等邑而泊勿送平安道并於黃海道分置安業  
○乙未日暈○咸吉道都體察使具致寬馳啓會寧吾音會高  
嶺等處任幹朶里等每遇事變入保城內民虜雜處恐或生弊

且將財產置之長城無時可安誠可矜憐近有逃去者必是未  
得安接而然也幹朶里等力請作堡臣謹已移牒會寧府使設  
壁堡且錄道內聞見事目以啓 召申叔舟示之 御札回諭

致寬曰既任卿以閩外之事卿何遠來取旨後勿如此并送事  
目一為幹朶里築堡事先是諭令待秋今既令築之旋又止之益  
生其疑不若急速築之一築堡宜令幹朶里等主之我人助之  
似自為者一尼麻車有問幹朶里築堡者宜答曰彼兀良哈朝  
夕竊發為自守之計我則助之耳○丙甲 上與中官幸昭格  
殿洞源溪邊河城尉鄭顯祖進豐呈 命花川君權恭驅北峴  
以勸用兵日晡 還宮○進鷹使柳泗賫欽賜彩段二表裏回

自大明○丁酉 傳旨刑曹曰今北方已定慶事日臻只悶獄

囚多滯甚乖時令自天順五年二月二十六日昧爽以前除謀  
叛大逆謀叛子孫謀殺祖父母父母妻妾謀殺夫奴婢謀殺主  
蠱毒魘魅謀故殺人但犯奸盜外已發覺未發覺已結正未結  
正咸宥除之敢以宥旨前事相告言者以其罪罪之○諭黃海

道都觀察使金吉通曰今徙居人令於白川金谷浦江陰助邑  
浦等處泊舟江陰白川本是殘邑不可久留預為措置隨其到  
泊即令分置毋致失所○御札諭咸吉道都體察使具致寬曰  
今賜卿衣鞞卿其領之○刑曹啓公處婢嫁良夫所生者妓則  
贖身免賤其他諸邑婢所生則不贖身而從良一般公賤立法  
不同公賤日減甚為不可自今東西班流品朝士文武科出身  
生貢進士成衆官有蔭子孫等及民年四十而無子者嫁公處  
婢所生內長子許告都官以年歲相准奴婢准換贖身禁約條  
件並依前法施行前此嫁良夫所生從良時外方官更不能辨  
正冒濫施行以致良賤混雜請自今依妓產贖身例並於主掌  
都官狀告贖身私賤從本主情願亦依公賤例施行從之○  
戊戌慶尚右道都節制使趙秀文馳啓對馬州饑饉人多離散  
命左議政申叔舟禮曹判書洪允成議應變之策叔舟等議  
啓宗成職使人到浦已令禮曹移牒上送姑待其來細問彼土  
情勢然後更議都承旨成任等啓慶尚道則已悉對馬州書契

爭意此以應變其餘諸道未知聲息請降諭使之隄備又令慶  
尚道益嚴候望備器機庶清道瑞山王子隄修築船軍鎮軍悉  
令放遣諸處赴役船軍亦皆放還以休其力郭連城迨今不來  
前都節制使自以為見代備邊諸事慮有踈闊請諭連城除朝辭  
赴任權權亦令速赴上曰所啓甚合予意承政院草諭書以  
啓上覽之命示姜孟卿及叔舟等更議孟卿啓近年我國定  
對馬州商船深處倭船之數自後宗成職向我國似有怏怏  
今當商船出來亦如前約則必不滿意聲言諸島作賊使我國  
疑懼蓋欲厚待也然有備無患誠如諭書謹候望備器機且送留  
浦解事倭人於宗成職曰島主能繼先志誠心報變嘉其忠款  
但深處賊倭皆由貴島島主不許則不得徑進如是開諭以觀  
情勢叔舟啓諭書事意不必廣諭諸道只令連城除朝辭速赴  
權權朴大生人品不相上下大生今已赴任進却之際恐致踈  
虞莫若仍任以實防禦宗成職使人更下諭督令上送 上從  
叔舟議 諭連城曰今方有聲息備禦之事不可少緩其除朝

辭速赴

諭大生曰今有聲息俾卿還任防禦諸事曲加布置

○漢城府啓京中五部外城底十里本無所管勸農官里正等事無大小不分是非任情狀告本府有乖大體請各以附近分屬各部常加檢察 從之○己亥先是遣官徵京畿開城府忠

清全羅慶尚道之兵至是諸道兵會丁箭串平騎兵總八千八百四十步兵八百以左贊成黃守身為支應使花川君權恭左廂大將判漢城府事金師禹右廂大將廂各三衛衛各四部以行上護軍李允孫金慶義信川君康衮行上護軍韓終孫鄭種僉知中樞院事權警衛將行上護軍金澣雜類將閔發捉虎將李恣生壯勇隊將金慶禮獅子衛將李澄珪射隊將部將二十四人統將九十六人又以領中樞院事洪達孫兵曹判書韓明澮楊山君楊汀禮曹判書洪允成中樞院副使權摯兵曹參判金碩前滿浦節制使成貴達兼宣傳官蓬原府院君鄭昌孫右議政權擘鈴川府院君尹師路左叅贊李承孫知中樞院事崔恒李純之工曹判書尹士昫守相中樞院事沈澮刑曹判書朴



元亨行上護軍黃致身青城尉沈安義戶曹判書曹錫文漢城  
府尹黃孝源行上護軍金旣守將吏曹參議金係熙刑曹參議  
申自準禮曹參議徐居正守門將左承旨金從舜左副承旨柳  
自煥守宮 上御交泰殿 召礮及右承旨韓繼禧親受講武  
節度恭師禹入內受 命領兵先發屯于綠楊平又 召明滄  
賜手札曰以卿為守大將守將以下卿其處置 命造守大將  
牌手書刻而授之○庚子 動駕讓寧大君提臨瀛大君璆永  
膺大君琰桂陽君增翼峴君璉順城君諲烏山君澍永順君溥  
寶城卿容龜城君浚玉山君躋銀川君贊榮元副令徐銀山副  
令徹富潤副令茅叔堤川副令蓋溪川監誠嘉林監秋逢山監  
溥雲城府院君朴從愚河城尉鄭顯祖領議政府事姜孟卿左  
議政申叔舟左贊成黃守身行上護軍柳洙柳河吏曹參判李  
克堪仁順府尹尹士昕行上護軍李澄珪洪逸童李士平都承  
旨成任右承旨韓繼禧同副承旨洪應兵曹參議權愷僉知中  
樞院事李孟孫洪順孫趙得琳行上護軍具文老柳興茂隨

駕駕至彌沙里平京畿觀察使李克培楊州府使慶由謹來迎  
克培進鷹狗分 賜宗親宰樞 駕還至綠楊平觀獵領議政  
姜孟卿啓奉常寺祭用獐鹿令平安黃海道獵獲兩道人民本  
少今方徙民舉道騷然且於使臣往來人民尤困故凡干進供  
亦皆停之司僕獵獲雖若有弊以此較彼自有輕重宜復司僕  
之獵勿定兩道 上曰司僕獵獲何不可之有姑觀講武所獲  
乃定是日分左右獲禽凡三十三口自後日較多少以為勝負  
上覽師律不嚴部伍不整 召諸將曰講武非以逸遊欲教  
閱兵法耳今者徵諸道不鍊之兵將帥教兵卒皆失律彼必謂  
兵法如是脫有變故將何用之將帥皆勲臣予不加責如大體  
何夕次抱川召兵曹參判金礪曰陣中喧鬧是何故也礪對曰  
軍士失輜重所在呼喚喧鬧耳 上曰陣貴整肅喧鬧如此而  
兵曹不之禁殊無意謂陣外八門各設明燎且樹標旗使知輜  
重所在則自無喧鬧矣即 命礪及洪允成設燎樹旗于八門  
以止之○辛丑遣官薦禽于 宗廟○咸吉道都體察使具致

寬馳啓曰慶興住女真萬戶屢沙哈慶源住指揮何伊歹兀彌  
乃等來言赴京回還時要索口糧到李滿住所居地面火刺温  
約三百餘名羣聚謂滿住曰將寇朝鮮滿住曰汝等徑由我地  
作耗我必受害朝鮮惠恤我等我當報變况汝等兵少必盡為  
禽殺火刺温等聞滿生言乃還又以密書啓臣觀形勢今方冰  
解三月望時月明水淺草木不密可以行兵農務方興兀良哈  
登山者必下彼疑再攻聚兵備禦已久銳氣必衰若乘此時入  
攻則殺獲多少雖未可料使彼奔潰失業可期也然彼請兵於  
尼麻車不見答累犯邊城一不得利故兵聚之時則或云欲向  
兀狄哈或云移居遠處或云會議歸順犯邊之時則或云欲報  
韓朶里私讎觀各處燃火之事非直欲來戰不過畏本國入侵  
多方恣備耳間有伐引阿赤郎貴之人因人報告云賊魁固宜  
見侵我輩無所犯而等被焚攻生理甚難將欲歸順但去年秋  
招諭効順之人而殄殲之以此未敢耳臣據此臆計雖各處事  
變不絕不須深慮但野人性本多疑聞我兵欲再舉方且譁然

今臣適至益生疑慮鍾城會寧居人等亦言前年宰相之來多  
率軍士終有攻伐今年亦然以此疑恐臣密令措置務要安定  
嘗此時舉兵入攻彼益忿怨數年之間鼠竊不息姑停攻討內  
整外綏自當歸順 命姜孟卿申叔舟等議之孟卿等啓具致  
寬已知 上指揮自為措置然適當農作且方草長若令彼安  
心耕稼秣馬則為寇未已當耀兵境上似若入攻者令彼不  
變在朝夕廢農收牧先自疲困歸附益固致寬所啓數條未詳  
宜更諭焉 因草諭書以啓曰今見卿密封備悉賊勢今莫若因  
其勢而撫之卿計得矣但賊自去年入攻之後疑我再攻逃竄  
登山入馬俱困因此所以欲投順也然報復之心未嘗忘也今若  
假其投順稍自安息以畜其力則必來見擾矣四月之初草長  
馬肥此其時也今令諸鎮陳兵出入似若入攻者使賊不得休  
息畜牧耕稼則賊勢必困矣困則其投順也必誠矣善戰者不  
戰而屈人兵卿宜料勢審機善處之卿書所云請兵尼麻車不  
見吞之狀各處然火之事未知其由又伐引等處人所言賊魁

未知指何人也卿前啓賊將移南羅貴今未知果然歟并詳聞見  
以啓 上覽之問於承政院曰致寬已知吾意不必別有指揮宜  
勿下諭承政院啓其中廢農牧以疲其力此正策之良者然致  
寬固所裕為所上條內雖或有未詳者其大意已洞然矣亦不  
必更問遂不下諭○江原道觀察使全繼孫遣都事金利用  
問安仍進鷹狗印分 賜宗親宰樞動駕至王方山打圍  
命桂陽君璿 賜議政府酒肉宦官延德生 賜承政院酒肉  
上問成任曰奉常寺淹醢鹿不足幾何對曰所不足者凡四十  
九口而十八口則司僕寺已獵獲其餘十一口定平安道二十  
口定黃海道是日獲獸凡七十餘 賜議政府酒肉有狐出使  
世子射之世子射殪之 上悅命進酒夕次地峴平 賜宰樞  
等酒肉○三月壬寅朔承政院奉 旨馳書于平安黃海道觀  
察使曰奉常寺祭用鹿以講武所獲供之其勿復進 動駕至  
栗長加平縣監安叔孫來迎 諭守官將相曰今賜鹿三猪二  
仍賜宴一懽夕次連洞驛平○刑曹參判李石亨京畿都體察

使成奉祖來問 安○癸卯 動駕至於里安打圍尋以雨罷

夕次雞山○元良哈大護軍者叱同介等來獻土物○甲辰

動駕至忠良浦正朝使李皎然副使李堰來復 命至安巖洞

口耆老宰樞待立 命饋之至興仁門外留都文武百官序立

迎 駕 傳曰京畿觀察使李克培講武時進供加於詳定數

若不之罪無以戒後其令司憲府推劾以聞承政院啓克培於

講武諸事悉無違誤請勿鞫 從之○進鷹使趙之唐賁欽賜

八表裏回自大明○命兵曹放還諸道徵來軍士○乙巳兵

曹判書韓明澮啓臣聞全羅道新造漕船不牢實請遣朝官審

之以軍器監正金謙光為敬差官往審○傳于禮曹曰民多阻

飢禁公處用酒○御醉露亭 召韓明澮及承旨等議徒民等事以

仁壽府尹尹子雲為京畿忠清全羅慶尚道都巡察使○雲城

府院君朴從愚請往浴海州温井 上曰黃海道今因徙民安

集事務煩劇可往他道從愚請往延豐温井 許之○京畿都

體察使成奉祖啓畿縣人民比因幽歎仰給義倉今考本道

米穀不過萬餘石正當農月乏食者多請運忠清道諸邑米穀賑貧窮民從之○丙午韋貞懿公主第視疾○賜讓寧大君昶孝寧大君補內廐馬各一匹○御康寧殿議政府六曹以講武還宮進豐呈王世子進酒班首領議政姜孟卿亦進酒訖讓寧大君昶孝寧大君補內宗親及蓬源府院君朴從愚兵曹判書韓明議政申叔舟右議政權擘雲城府院君朴從愚兵曹判書韓明澮南陽府院君洪達孫中樞院使沈澮右叅贊成奉祖中樞院事沈決工曹判書尹士昀仁順府尹尹士昕侍宴其餘宗親宰樞賜宴于思政殿月臺○賜宴卓于忠勳府○初命兵曹翰講武所獲鹿以供祭用兵曹令察訪李昫輸之昫不即輸以致枵敗判書韓明澮請鞫之命下昫于義禁府令司僕寺獐獲以補不足○承政院奉旨馳書于忠清道觀察使任孝仁曰朴從愚今往延豐溫井給米十石○丁未耆老宰樞等設踏青宴于慕華館賜酒樂命都承旨成任賫宣醞賜之○判奉常寺事任元濬啓儒生數人道遇臣家女奴欲奪簪花女奴走入臣

家二生排門而入揚言曰予知國家倒行故元濬得為判書請問其由命閉城門搜捕下中部儒生洪繼性吳承奭金繼善

崔間任微崔敬于義禁府鞫之○陰陽學提調啓曆日之法中

朝秘之冬至前不許頒行今合校書館監印則非唯不密書負匠人任意私印甚為不可請依舊例令書雲觀掌之從之○

戊申傳于承政院曰民多阻飢酒房香醞亦勿進○己酉

傳曰漢城府啓城底十里居民三百餘家今方絕粒請發義倉粟賑之何至於是不之救耶左承旨金從舜啓比來市肆米頗賤而城底之民安有絕粒垂死者乎漢城府欲發倉故如是啓之耳命宦官李存申雲往審民戶存等回啓民家所儲米或有一斗或有七八升者不過六七戶命發粟賑之○傳曰

百姓飢餓農事方殷而如世子宮孝靖廟懿墓齋庵及鍾閣皆非急務可姑停營繕且繕工監於江原道伐材人夫率用農民其數幾何右承旨韓繼禧啓孝靖廟鍾閣則已停役世子宮造成軍當番防牌三百名伐材軍當番防牌三百名及忠清江原



道當領船軍各四百名若軍人不足則許令抄發民戶今當農  
月營繕頗多請放京外赴役下番軍人江原道民戶勿令役之  
○禮曹據慶尚道觀察使關啓薺浦倭三十八戶本月二十八  
日夜失火延燒舊例富山薺浦倭戶失火者遣本曹郎官賑恤  
今當農月不且煩驛路請令本道觀察使照依舊例賑恤 從  
之○禮曹啓隣國客人饋餉及本朝使臣 賜餞時請依前例  
用酒 從之○元良哈上護軍權豆等來獻土物○刑曹啓前  
郡事李剛之狀告其弟中樞崇之辱我者祇一事關綱常請令  
司憲府推鞫從之○司憲府啓前日請遣行臺捕前長城縣監  
權得宗已蒙准而尋 命停之臣等以為因其亡匿遂不窮竟  
則貪墨之輩無從懲惡效尤者繼起漸不可長請遣本府吏于  
得宗本家及切隣親故可疑處窮搜抵非 從之○庚戌 旨  
領議政姜孟卿南陽府院君洪達孫花川君權恭禮曹判書洪  
允成等曰今當農月土木繁興世子所處麟趾堂當夏煩鬱故  
欲構新宮然凡人處世無不足則福必損世子宮不可建也其

餘不得已營繕處亦多然今工役頗煩又方徙民安集之時  
度寔繁可悉停罷唯鍾閣木石已具不可緩構 召繕工判事  
邊大海問役幾日罷對曰役之久近在軍多少 上曰令兵曹  
抄發軍人安有不足孟卿啓近年以來歲屢不登軍資日減其視  
世宗朝蓄積十減六七古人云國無三年之畜國非其國今  
罷營繕實為善計但鍾閣材木既具今若不建必至腐朽莫如  
及時營建議遂定又 傳曰貢物代納本欲從民情願今者不  
察本意雖民間易備之物皆令代納貽害於民近者孝寧大君  
補與忠勳府請於貢物未納前先收其價夫如是則未納貢  
物而先欲收價者繼踵而起民間受害不可勝言孟卿啓代納  
之弊誠如上教臣聞朝士連結商賈代納者多守令亦因干請  
雖民間易備之物皆令代納非唯病民士風亦汚 上曰卿言  
是矣當廣諭諸道觀察使守令遂 下諭諸道觀察使曰諸邑  
貢物內民所難備者從情願許令代納者本欲寬民財也今聞  
守令或因干請或怵威勢雖民間易辦之物不問情願輒給文

引且不考收納之文收價先給遂使良法反以害民於委任字  
收之意何予甚祗之自今一依大典從民情願且考收納之文  
給價如或有違以棄毀制書論卿亦難逃重責卿知此意廣行  
知會勿貽民弊全羅道都觀察使李孝長來見病妻辭還上  
引見曰貢物代納其弊不貲卿當體予意盡心糾察且箭竹經  
年所伐之法前降諭書盡之卿其用心奉行 命進酒○刑曹  
啓公私賤為僧者禁防條件一公賤為僧者告于宗門宗門  
選能誦金剛經心經薩怛陀而有僧行者具由報禮曹禮曹啓  
收丁錢給度牒其名字及主司之名移牒本曹本曹於諸衙門  
案籍錄其事由公賤為尼者亦依此例但尼僧本無度牒不  
必收丁錢一宗門選試時一經不誦者不許為僧轉報禮曹移  
牒本曹及本衙門知會一私處奴婢從本主情願為僧尼者本  
主告于宗門依公賤例選取勿許本主使喚一公賤為僧者滿  
三朔不出度牒則本僧及族親切隣中具由告官不告者族親  
切隣抵罪每滿三朔必告滿一年猶不出者還俗 從之○辛

亥咸吉道都體察使具致寬馳啓賊虜百餘潛入穩城射殺  
農民一人中箭者七人擄牛八頭而去本鎮節制使鄭俊領兵  
追擊射殺人三名馬二匹中箭殺水者十人登山者十餘人獲  
馬一匹盡奪被擄牛畜獲軍器甚多賊遂敗走 命示左議政  
申叔舟叔舟以書啓近日六鎮軍士累戰頗有功宜遣朝官慰  
撫第功論賞且令觀其攻戰之勢 上曰可即以兼司僕寺尹  
李經為敬差官 諭致寬及都節制使康純曰穩城人能出奇  
破敵其功可嘉不特此也近日諸鎮軍士頗著戰功不可不慰  
撫茲特遣人獎諭仍饋軍士之有功勞者卿宜第其前後功勞  
以啓且穩城作賊者誰其數幾何亦聞見以啓○日本國肥前  
州上松浦鴨打源永對馬州太守宗成職各遣人來獻土物○  
刑曹據黃海道敬差官鄭宗周啓本啓海州甲士金緝金永南  
謀害牧使許從恒虛捏陳訴邑吏崔濬列從恒過失嗾緝訴之  
至言垂當見代多般辱之若以會赦不治無從懲惡緝會以罪  
定役劔水站請永屬本站永南破家黜鄉濬永屬本道殘驛吏

命皆徙居他道緝屬徙居慶驛吏○壬子日暈○平安道都觀察使曹孝門都節制使黃石生等奉書于承政院以啓曰李滿住遣人到滿浦言曰我子弟及管下人受大國職賞如聞變故雖夜馳報仍請米豆已許之 命示申叔舟仍 御書曰建州人頻頻告變自售得無深處兀狄哈畜力之勢耶此益加隄備之時也叔舟啓上教允當然臣意以為頻頻告變只著效力之誠耳且今解米別無隄備之事○以成任爲吏曹參判李皎然司憲府大司憲金從舜都承旨韓繼禧左承旨柳子煥右承旨金國光左副承旨洪應右副承旨李文炯同副承旨辛永孫司憲執義申鵬掌令李堰全州府尹倭人平茂續兼司僕○癸丑 御思政殿引見倭人上護軍平茂續等四人 命禮曹判書洪允成 傳于茂續曰汝前此來時或隨駕或射侯稍解我國言語汝雖不得永居于此當其出來時則宜屬司僕寺侍衛茂續對曰敢不惟命 上又謂茂續曰子常恨汝輩無侍朝者今予待汝優厚汝欲居此任汝所爲今以汝屬於司僕寺待汝之禮異於他人當習朝士禮度謂同

副承旨李文炯曰汝知拜承旨之意耶對曰不知上曰向者汝能  
作詩故今擢汝為承旨當以興學自任○命注書李壽男宦官李  
慎延德生等往義禁府典獄審濫刑成傷者有刑傷者傳曰某  
某人以何罪見囚官吏鞫之何條杖之何日更問囚人以啓問之  
則囚人各以實對皆賊人也遂傳旨司憲府曰義禁府提調朴  
從愚成奉祖黃致身李崇之知事羅裕善刑曹參議申自準正郎慎  
承善朴纘祖佐郎柳瞻等濫刑囚人其推劾以啓○甲寅成吉道  
巡察使康孝文都節制使朴炯節制使康純上箋謝賜宴其箋  
曰綸音澳發特賜密勿之言睿津覃流昭示獎諭之典息出望外  
愧積膏中伏念臣等才乏運籌勇非禦侮每遇門庭之寇幸致全  
師縱輸弓劍之勞未能獻馘方恐譴責之至反蒙褒美之加秩秩  
寔遙悅侍天日之表厭厭夜飲宛聞管籥之音諸將舉皆歡欣三  
軍咸得醉飽茲蓋伏遇邁湯勇智齊舜聰明憐臣等敵愾之微忠  
記臣等折衝之寸效遂令鷲品獲霑鴻恩榮動山川事罕今古臣  
等敢不劂勵士卒振播威靈三捷獻功庶屏豺狼之迹萬死圖報

期輸犬馬之誠○傳旨兵曹曰司饗房諸色掌逆兒內八品遠  
兒一輪授掌銀器者八人○日本國筑前州大宰都督司馬少  
卿藤源明朝臣教賴五島守久守源勝各遣人來獻土物○乙  
卯 命知中樞院事崔恒右承旨韓繼禧等文臣三十餘人用  
諺字譯蠶書○元良哈都萬戶金阿羅哈等來獻土物○丙辰  
親傳先蠶祭香祝 御札傳旨禮曹曰僧中汎濫者多污穢白  
法漸不可長中外寺刹一從清規糾察有犯殺盜淫者其寺住  
持告官如無住持寺則其山巨刹告官兩宗統察若有現然犯  
法者而兩宗不能檢舉則啓聞推劾又 傳旨刑曹曰僧人有  
犯殺盜淫者並還俗當差○丁巳 御思政殿受常祭視事宗  
親及李承孫金鈞魚孝瞻李石亨等入侍設酌 上謂承孫曰  
近日刑曹義禁府濫刑囚人至斷足指在京尚爾况外方乎時  
承孫提調義禁府無以對 御忠順臺射侯設酌孝寧大君補  
及內宗親河東府院君鄭麟趾領議政姜孟卿禮曹判書洪允  
成兵曹判書韓明澮等入侍 命允成與野人浪將家老倭人

平茂續射侯 賜茂續弓矢○戊午兵曹據黃海道都觀察使  
啓本啓黃州棘城遂安防垣兩鎮本因置屯田而設口傳軍官  
各三人并僕馬一車糧料米七十石黃豆八十六石積至十年  
米豆并一千五百二十餘石非關防戍坐耗軍資其弊不貲請  
依無軍鎮例革兩鎮軍官 從之○傳于禮曹曰自今宗親及  
二品以上宰樞有疾者遣醫給藥一如 世宗朝例○己未  
駕幸峩嵯山觀放鷹至妙寂山觀獵獲獸七八口 駕還至普  
濟院前覘兵曹判書韓明澮啓觀獵時步卒二人為流矢所中  
即斃 上召內禁衛等問射殺人者曹漢臣崔倫等啓臣等射  
獐誤中○幹朶里豆里兀良哈老古等來獻土物○庚申中樞  
院副使韓瑞龍年賻米豆并二十石紙一百卷油茱三部棺槨  
以佐翼功臣終孫父也○以安哲孫平茂續僉知中樞院事○  
辛酉 傳于戶曹曰妙寂山觀獵時驟與人古邑同京中人莫  
金等中流矢死其各賻米豆并四石○傳旨義禁府曰內禁衛  
曹漢臣崔倫妙寂山觀獵時射人致死推劾以啓○承政院奉



旨馳書于咸吉道觀察使曰多取桑椹分送北道諸邑令依法種之審立苗之狀以啓○舍人鄭文炯將本府議啓令聞養賢庫諸粟已罄報禮曹則曰米穀出納非本曹所管報戶曹則亦不轉聞計所餘不過一二日之餉今不繼之勢將罷學如國家大體何且遠方儒生隻身到京仰給公廩一朝罷養無所於食誠可憐恤忠清道田租朝夕且至請以倉米繼之 命給養賢

庫米三十石○吏曹啓叅詳正統八年十二月日受

教節該

宗室爵秩叅酌古制及禮經當據五服為定王子內中宮之子封大君側室之子封君皆正一品無資王孫將承襲者從二品衆孫正四品曾孫將承襲者正三品衆曾孫從四品玄孫將承襲者從三品衆玄孫正五品當承襲者父歿承襲後王孫則從一品曾孫則正二品玄孫則從二品將承襲者父未承襲之前依支子例諸孫內良妾之出各降一等賤妾之出又各降一等在前每一等一資未便當依文武官例用二資正一品顯祿大夫興祿大夫從一品昭德大夫嘉德大夫正二品崇憲大夫承憲

大夫從二品中義大夫正義大夫正三品明善大夫彰善大夫  
從三品保信大夫資信大夫正四品宣徽大夫廣徽大夫從四  
品奉成大夫光成大夫正五品通直郎秉直郎從五品謹節郎  
慎節郎正六品執順郎從順郎為人謹良者特旨加資又依古  
列侯卿侯之制一品稱卿二品稱尹三品稱正四品稱令五品  
稱監六品稱長以部曲鄉里之號封之將承襲者至二品則封  
君袒免親依異姓有服親例叙用親盡依文武官例施行天順  
元年七月日受 教節該近年以來累次別蒙加資例授五六  
品者陞授彰善隨其資級給祿祿科猥濫依詳定職秩稱行給  
祿正從分揀為難正三品稱正從三品稱副正正四品稱令從  
四品稱副令正五品稱監從五品稱副監正六品稱長令更察  
詳立法雖密嫡庶未辨有違大體自今王孫內將承襲者大君  
子則正二品諸君子則從二品眾孫內大君子則從三品諸君  
子則正四品曾孫將承襲者大君孫則從二品諸君孫則正三  
品眾曾孫內大君孫則正四品諸君孫則從四品玄孫將承襲

者大君曾孫則正三品諸君曾孫則從三品衆玄孫內大君曾孫則從四品諸君曾孫則正五品當承襲者父歿承襲後王孫內大君子則從一品諸君子則正二品曾孫內大君孫則正二品諸君孫則從二品玄孫內大君曾孫則從二品諸君曾孫則正三品請改詳定將承襲者父未承襲之前依支子例施行事諸孫內良妾之出各降一等賤妾之出又各降一等事仍舊施行從之○義禁府啓中部儒生金繼善洪繼姓等路遇任元濬婢綠未欲奪簪花追入元濬家繼善罪應杖八十繼姓杖七十從之繼姓功臣之子勿論○癸亥 命兵曹判書韓明澮往審京畿高陽堤堰○傳旨司憲府曰養賢庫耗儒生所供米十九石其劾當該官吏以啓○甲子元良哈副司正南羅等來獻土物○乙丑召左議政申叔舟禮曹判書洪允成戶曹參判李克堪軍器監正金謙光司贍判事朴健順議政府舍人安寬厚禮曹正郎申末舟與左副承旨金國光會賓廳讎校北征錄 命河城尉鄭顯祖質諸叔舟等以正訛謬 上曰今可印

乎印則印幾件乎叔舟啓可印數百件但臣等於北征之事素  
所經歷今始撰至今目憤口熟不覺有誤 命文臣如崔恒輩  
精加校讎然後印之 上曰然 咸吉道都體察使具致寬馳  
啓曩者穩城之戰我軍死者及彼人中箭溺死之數更詳問以  
啓且奉書于承政院以啓本月二十三日將舉事適雨雨又冰  
雪消融山谷水深未得渡江同封事目乞並啓稟 御札回諭  
致寬曰賊連來犯邊豈真歸順者耶是欲作農姑且歸順以弛  
我耳為今之計來者曰來去者曰去禦若雷天重若泰山深若  
大海治吾氣而精吾計常若臨陣勿失可乘之機勿貪小得之  
利以全而動外為每攻之狀使賊不得休息農作畜牧以困之  
可也但諭予意而已卿自善處之矣予何遙制諭後條件卿其  
斟酌為之 於乙丑前春雖與於會寧鏡城之賊其後來見申  
叔舟洪允成自言歸順不復與賊今又欲謁康純是與他賊有  
間矣來則固宜撫之然不可特厚以示弱亦不可為難繼之例  
如不來則不可區區招之一柳尚冬介在前無大從賊之迹今

其形勢情狀何如卿宜密計以啓一賊之移南羅貴果然乎亦  
宜密計賊酋如金彼乙大等來往情狀與賊中離合形勢續續  
密啓又 諭曰憐卿久勞塞上無日忘懷然賊方有欲歸順者  
亦有作耗者非卿不能審幾處變予欲卿姑留五月之間觀賊  
形勢然後上來卿可斟酌進退之不可預定朴炯旣蒞任留也  
不留亦在卿意康孝文則不可亟來可待召命○丙寅 命召  
河東府院君鄭麟趾蓬原府院君鄭昌孫領議政姜孟卿左贊  
成黃守身左參贊李承孫工曹判書尹士昉戶曹判書曹錫文  
工曹參判魚孝瞻刑曹參判李石亨吏曹參判成任禮曹參議  
徐居正戶曹參議李芮判司瞻寺事任元濬詣賓廳與左承旨  
韓繼禧右副承旨洪應同副承旨李文炯讎校北征錄○向化  
兼司僕馬右其死 賜賻米豆并十石紙七十卷棺槨○丁卯  
幸西山觀獵 上望見坡平尉尹巖別墅時巖在服 遣中使  
諭之曰召之則卿必勞予往則瘠有汎掃之弊宜遣卿一子來  
謁巖即遣其子 上問 巖寒暄賜內廐馬一匹○戊辰諭諸道

觀察使曰今年節氣比他年差早慮愚民緩於播種未及有秋  
卿其廣諭敦勸毋致失時○賜密城君琛米三十石黃豆二十  
石田昫內廐馬一匹○以宋處寬行僉知中樞院事權權判昌  
城都護府事○庚午 御思政殿受常然視事 命二品以上  
入侍設酌令宰樞行酒 上謂同副承旨李文炯曰前者藝文  
月課詩卿居魁予甚重之顧謂史官等曰爾等年少須當讀書  
都承旨金從舜啓摠兵官董興遼東大人耿和等請弓今次謝  
恩使之行必問賚來與否何以處之 上議於申叔舟對曰前  
此有贈弓之例只將二三張密贈之仍語曰外國以兵器相贈  
恐朝廷聞而責之則彼必不敢更說矣 上曰吾意不然今朝  
廷法令甚嚴非如曩時以兵器私遺邊將於義不當萬一朝廷  
問之將何以答之頃者王軌鞍子之事亦可鑑也叔舟對曰  
上教允當 上曰當以此意作事目見大人解說○上聞楊山  
君揚汀到廣州病劇遣內醫宋瞻往視之

(B)  
732.55  
4724  
[v.7]  
no.8  
0163745

昭和五年十月五日印刷  
昭和五年十月十日發行

(景李朝實錄太白山本)

京城帝國大學法文學部

京城府蓬萊町三丁目六十二番地

印刷所 朝鮮印刷株式會社

(B)  
732.55  
4724  
[v.7]  
no.8